



الهيئة العامة لقصور الثقافة
إقليم القناة وسيناء الثقافى

البطاحيش الغريبال

تأليف : عبد القادر مرسى
تقديم : د. مصطفى عبد الغنى

مطبوعات
إقليم القناة وسيناء الثقافى



بسم الله الرحمن الرحيم

خصوصية المكان والإبداع المتميز

إذا كان إقليم القناة وسيناء الثقافي قد أعلن منذ البداية وهو يرسى قواعد النشر في هذه المنطقة الغالية من أرض مصر أن حركتنا لابد أن تركز على ثوابت لامناص منها تتمثل في الجودة والابتكارية والرؤى الخلاقة التي تفتح الأفاق الأرحب لتستلهم خصوصية المكان في تفاعله مع الحراك الإنساني هنا..

وإذا كنا قد أعلننا أن هذه الثوابت هي دستورنا لرعاية فيض الإبداع الأدبي والفني الذي تزخر به أرض القناة وسيناء شعراً وقصة ومسرحاً ورواية.

فإننا وفي هذا الإطار نلتقي مع هذا الإصدار الذي نقدم من خلاله واحداً من هؤلاء المبدعين الذين يذخر بهم إقليمنا المتميز والذين يضيئون وجه مصر بكل ما هو نافع وجميل.. ومعه نقدم باكورة سلسلة من مطبوعاتنا تعنى بنشر الأعمال الإبداعية نبدأها بمسرحيتين من تأليف الأديب والفنان المخرج عبد القادر مرسى الفائز بالمراكز الأولى عن هذه المسرحيات في مسابقات أندية المسرح.. مع تقديم لهما وشرح وتحليل من ناقد كبير هو الدكتور مصطفى عبد الغنى.

مع أمل بأن نواصل لاحقاً نشر نصوص أخرى لمبدعين آخرين يضيئون إقليمنا بإبداعاتهم الجميل.

عبد الرحمن نور الدين
رئيس إقليم القناة وسيناء الثقافي

المسرح المصرى بين التجريب والتأثير

قراءة أولى فى نصوص درامية شعبية جديدة

د. مصطفى عبد الفنى

بين أيدينا العديد من النصوص المسرحية التى يغلب عليها جميعاً سمة واحدة نابعة من خصوصية المناسبة التى قدمت فيها والجهة التى كانت - فى الأساس الأول - وراء تقديمها.

ويمكن أن نشير من هذه النصوص إلى خمسة تأتى - حسب أهميتها الفنية - على النحو التالى :

- البطايش
- الغريال
- سبع سنين
- قصر الأحلام
- المجنون

ولأنه يصعب تقييم نصوص تجريبية خمسة فى حيز بسيط ثم يعاد إليها للنظر بوعى نقدى فى مثل هذا الحيز. فسوف نتمهل عند أجودها ، على أن ينصرف التقييم والرؤية النقدية إلى بقية النصوص.

ويدهى أننا اخترنا هنا النصين الأولين- بغض النظر عن تقييمهما الدرامى من قبل أو

تكريمهما - فهذان النصان يعدان من أنضج النصوص الدرامية التجريبية التي بين أيدينا. دعك من (التجريب) المحدد في كل بناء درامي، فهما بخصوصية مميزة. وسوف يكون واضحاً منذ البداية أن القاء الضوء على هذين النصين- كما نكرر - بهدف الوصول إلى درجة استنطاق الفعل الدرامي عن طاقة التعبير الدرامي، وفي الوقت نفسه: البحث عن درجة الافادة من توظيف (الشعبي) في هذا السياق. وما يزيد من أهمية هاتين التجريبتين : أنهما- وقد لمستا التجريب وحاولتا الافادة منه اقتربتا من الجمهور في العرض. فكان شرط (الفرجة) من الشروط التي تؤكد ضرورة التوقف عندها، فبيدهي أن هدف أية (رسالة) لا يكون بالبحث عن المرسل منه وإنما عن (المرسل إليه). إذ أن طبيعة هذه (الرسالة) مهما تكن أهميتها لا تتأكد ولا تصبح شرطاً للفعل الايجابي قط الا حين تصل إلى وعي (المتفرج) الذي يصبح واعياً لطبيعة الرسالة فاعلاً في الحدث الدرامي أو مفعولاً به على السواء.. وعلى هذا النحو . نستطيع أن نقبل على هذين النصين وفي وعينا أنهما نالا شرط الوجود الدرامي حين استطاعا أن يصلا برمزمهما أو بجوهرهما إلى هذا المتفرج الذي يكتب العمل من أجله.

فمسرحة (البطاحيش) - قد نالت كل هذه الشروط:

- المسرحية، منذ البداية تحمل كل شروط المسرح التجريبي وتقترب تحديداً من شكل مسرح (السامر) المعروف في تراثنا. فهي تجسد من خلال (حقل) في منطقة حساسة من جغرافيا البلاد، تبدأ من ريف في مصر (ريف ما) لتنتقل إلى منطقة في مصر (المنطقة الحرة ببورسعيد). وهي لهذا تستخدم مناخاً خاصاً صنعه انفتاح البلاد. وخاصة المناطق الهامة فيه وفي عصر (الانفتاح) إلى أفاق كثيرة مجهولة.
- المناسبة إذن : هي حركية الفعل الدرامي في بورسعيد والشخصيات تقترب من الموضوع الدرامي الذي قامت من أجله المسرحية متلاصقة متعاونة إلى حد بعيد والمسرحية تجسد لقطاتها في عدة لوحات متوالية :
- الشيخ طه المهاجر يترك أقرانه وقد كان مهاجراً عندهم ليعود إلى بلده.
- جمرك بورسعيد.
- تغير المنطقة الحرة بعد سنوات خمس إلى السوء والمزيد من الاستغلال و(الهجر)

والجشع.

- دراما حركية توضح التدهور الاقتصادي بين عامي (١٩٨٧ / ٨٣)
- لوحة أخرى (السادسة) تعرج على الانتخابات وتتمهل عندها.
- لوحة توضيح، على قهوة أبو السيد، وتعميق أكثر للخطاب المسرحي.
- وعلى هذا النحو فإن توالى اللوحات يصنع تراكما دالا فى فصول مؤسية مبكية إلى ما انتهت إليه تجربة السوق الحرة، وما وصل بنا عقد السبعينيات كله. ويهتم الكاتب بفترة زمنية تصل بين فترتى انقطاع فى غاية الخطورة من تاريخنا (قبل ١٩٦٧) وبعد (١٩٧٣).
- إن ما يحدث فى هذه الفترة على مستوى (مدينة مفتوحة) هو ما يحدث فى البلاد كلها . انظر إلى هذا الحوار بين البائعين :

- إيه

- الجماعة المراقبين

- بتوع التموين

- ماتصحى .. تموين مين؟ بقولك بتوع .. الامتحانات

- مالهم ؟

- عاملين فردة ع العيال بتوعنا

- .. الجماعة دول فاكرين بورسعيد دى ايه؟ هونج كونج .. ولا تايوان .. يقوموا يجولنا من محافظات تانية عشان يراقبوا على التلاميذ فى الامتحانات .. ويقدروها اعانات ..
- (و)...

- كل واحد من الناس دى بيحى وفى جيبه لسته طلبات .. من الفيديو لغاية اللبان

.. (و) ..

والغريب أن يحدث هذا فى بورسعيد ، بل الغريب ألا يقع هذا فى بورسعيد ، حيث منطق الجشع والاستغلال الجديد الذى ينسحب على كل شئ يصل إلى عقل الاجيال الجديدة. فيصبح المعلم (= المستغل) ويصبح الطالب (= المستغل) - مع حفظ علامات التشكيل..

ومن خلال هذا المثال استغلال المعلم (الذى نردد مع شاعرنا البائس فجأة لنجد بورسعيد (= مصر) وقد تحولت إلى معلم فاسد وبائع غشاش. وطبقات متفاوتة. وفساد

يعيش فى كل شئ بدءاً من تعامل المخبر الصغير مع الأمالى وصولاً إلى صور الفساد
الرهيبة التى نعثر عليها زرافات لا فرادى فى الانتخابات وصور الأحزاب الكوميدية أو قل
المحزنة ... الخ)

- إن العمل فى المنطقة الحرة ببورسعيد خير من السفر إلى أى بلد عربى ففى هذه
المدينة كل شئ.

المنطقة الحرة تصبح حرة كذباً. يقول أحد الشخصيات (حرة ازاي وهى محاصرة من
كل حته.. كردون خيام، أمن موانى .. والمنافذ شبه بوابات السجون).

تصل السخزية إلى مداها حين يغنى البعض:

قسم ياعم قسم

يعيش أهل بلدى

يعيش يعيش يعيش

- وتتحول السخزية إلى كل شئ: فالاسماء هى الشيخ شنكح وفلفوس (أى
فيلسوف). التخين، معلوف. الهفوف.. الخ.

- وفى نهاية النص نسمع صياح هذا الفيلسوف:

أنا أرى الانفتاح حلو قوى

وحين يصيح فيه البعض تتداعى الصور الدامية:

اسكت وانتوا واكليتها والعة ياعم.. كله مستورد ... تأليف وتلحين .. الخ

وعلى هذا النحو يستطيع الكاتب بمسرحية صغيرة فتح الباب على (هزلية) كما نرى فى
بعض الاحيان فى صورة السامر وإنما يقوم الشعب كله بالدور المطلوب منه رضى أم لم
يرض.

الملاحظة السلبية الوحيدة فى النص أنها كانت مباشرة قليلاً: إذ لم تستطع اخفاء هول
ما يحدث فى رداء الفن الجميل.

لكن لا يجب أن ننسى أننا أمام نص (تجريبى).

إما أننا - وهو رأى الخاص - نرى أن الواقع لم يعد يحتمل أن نتحايل دائماً فيه بالفن
. فالواقع أكثر عنفاً ومأساوية مما يمكن أن يأتى به الفن نفسه وهو ما وجدناه فى هذا
النص. وإما أن نتلمس الفن فى لحظات خفوت المعنى وضياح الدلالة.

ويقترّب منه إلى حد بعيد (الغربال). النص الآخر..
ونص (الغربال) يقترّب من النص السابق في كثير من العناصر :
- فهو يحمل فهما مقارباً للسامر الذي يرتبط بالمأثور الشعبي .
- إنه يحمل الكثير من عناصر التجريب.
- إنه يحاول أن يتخذ من الفلكلور الشعبي شكلاً يقترّب به من الدراما المعروفة في تاريخنا.
- إنه دائم الربط بين البحيرة (البلاد) كرمز من الرموز الكثيرة التي استخدمها وتحسب له.
- إنه يسعى ليأخذ - كما السامر- شكلاً مكانياً محدداً محاولاً خلاله أن يدير الحدوثة والحكاية بشكل موح ...
فإذا القينا أحجاراً أكثر في شكل الدائرة الدرامية عنده لرأينا عدة ظواهر أخرى منها :
- إنه يحاول - على المستوى التجريبي - أن يستفيد بالاشكال الدرامية في الريف المصرى. ومن هذا (كما نجده في دراسة عبد الرحمن عرنوس) في بحثه (عن العلاقة بين معملية التجريب وجماهيرية المأثور الشعبي) والذي ألقى في ملتقى القاهرة العلمى لعروض المسرح العربى (١٩٩٤) .. من هذا نجد المقاربة الكبيرة بين هذا النص وشكل مسرح (الصيادين) حيث يدور الحدث على شاطئ بحيرة. وفي وسط هذه البحيرة عند عودة الصيادين من رحلة الصيد وبعد جمع شباكهم ومحصولهم وهم يتناولون الغذاء تأتي إليهم المركب / المسرح فتتجمع المراكب والصيادون في حلقة لتتوالى مشاهد الحدث الدرامى و ببعض التصرف البسيط ففى مسرحية (الغربال) نجدنا أقرب مانكون إلى هذا المسرح الشعبى حيث - منذ البداية - أمام حيز الفرجة فى دائرة غير مكتملة اشبه (بالسامر) وحيث تدور الأحداث من خلال ممثلين من واقع البيئة ، لتسلمنا أكثر إلى ممثلين حقيقيين يقترّبون بنا من الحدث.
الحدث يمكن أن يلخص فى كلمتين : إنها المأسى التى تدور فى - وعن - البحيرة حيث يدور الحوار ليصل بنا إلى الدلالة الأخيرة.
- لم يعد أحد يهتم ببحيرة المنزلة، - البحيرة التى يتعيش منها عدد كبير من أهل

البلاد.

- زادت النفايات والتلوث دون انتباه أحد من المسؤولين إلى شكوى الاهالى ومرارتهم
- ترتبط البحيرة (البلاد) وحاكم البحيرة (الحاكم) فى دلالات رمزية حادة فحيث يوجد
السلطان يوجد دائماً الاهتمام التام فى تأكيد العيش الرغد والطرق الجديدة والزينة
الكثيرة. وحيث لا فقر ولا شكوى..

ويظل النص يدور داخل حلقة السامر حول كل ما يحيط بنا جميعاً من مأس. ووقفه
الكاتب عند الانتخابات هى وقفة هامة فى هذا السياق. فكل وسائل التجاوز والتحريض
والنفاق التى تحدث فى انتخابات أهل البحيرة فى فترة زمنية معينة هى ما تحدث لنا فى
أى زمان ومكان، وعلى الرغم من مضى شهور كثيرة ربما تصل إلى سنة بين كتابة هذا
النص وانتخابات شتاء ١٩٩٥ (ديسمبر)، يرينا إلى أى حد يمكن أن يكون الفن واعياً فى
تقديم التجربة مريرة كما هى . والتنبؤ بمرارتها التى تتكرر دائماً . وقد رأينا آخر (صورة)
لها فى آخر العام ١٩٩٥.

ورغم أن النص لا يتوقف ليعرض لنا الكثير من السلبيات - خلال الشكل الشعبى الذى
اختاره لنا . فهو لا يصنع ايهاً أوسوراً سميماً بيننا وبين ما يحدث قط. فنحن داخل هذه
الحلقة أو خارجها نعيش فى هزليات مصر فى نهاية القرن العشرين. وهى تترك لنا أسئلة
كثيرة معلقة على لسان الشخصيات :

- مين اللى ورا تلوث البحر والبحيرة والاقتصاد والسياسة؟

- مين اللى عاوز يحول مصر لمزبلة العالم وجبانة للنفايات النووية؟

- مين اللى ورا طمس هويتنا الثقافية والدينية؟

- مين .. ياناس

.. (و) .. الخ

على أن الملاحظ أن النص كان مباشراً شديداً المباشرة، فإنه بالقدر نفسه يصل إلى
الرمز ويستخدمه استخداماً حاداً . أنظر على سبيل المثال استخدامه لعنوان النص
(الغريبال) فى هذا الحوار حين يهب جابر ليمضى من أمام الجندى. ويدعوه الجندى
ليأخذ غريباله يدور هذا الحوار:
الجندى - ياريس .. ياريس

- جابر - أية خدمة
- غربالك
- آه .. لما تلقوا حاجة ع الشط بتودوها فين
- بنسلمها للحكومة
- آه حط الغريال على وشك كده
- (الجندي يضع الغريال على وجهه)
- شايفنى؟
- أيوه
- بص للناس دى كده (ينظر الجندي للجمهور) شايفهم كويس؟
- أيوه
- خلاص .. أدى الغريال للحكومة .. يمكن تقدر تشوف منه.
- واضح ما فى هذا الرمز من دلالة المثل الشعبى الذى يقول عندنا إن الذى لا يرى من الغريال يصبح (أعمى) ..
- وهى دلالة يقينية لا تشوبها أية شائبة.
- بل أن الكاتب يأخذنا من الرمز المباشر إلى الرمز غير المباشر حين يبدأ فى الختام اغنية لينهيها وقد تحول الشكل إلى مجموعة من البشر تشدها إلى قاع البحر احماله الثقيلة من التلوث- ويثبت المنظر لينتهى النص داخل الستار لا خارجه.
- وعلى هذا النحو تنتهى هذه (القراءة) لهذين النصين : وهما يحملان أكثر ما يحملان :
- عمق التجريب
- وعمق التأثير الشعبى
- فضلاً عن الوعى الذى يصل من قلب الكاتب ليصل مباشرة إلى قلب (المتفرج).
- وهذا هو الهدف الحقيقى من الدراما المسرحية.. أية دراما.

البطاحيش

تجربة مسرحية فى فصل واحد

قدمت هذه المسرحية فى المهرجان الثانى لنوادى المسرح بالاسماعيلية (مايو ١٩٩٢) وقد فازت بالمركز الأول ثم قدمت بعدها كعرض الأفتتاح (خارج المهرجان) للمهرجان السابع للجمعية المصرية لهواة المسرح على المسرح المكشوف بالأوبرا فى نفس العام ثم شاركت فى مهرجان القاهرة التجريبى الدولى الرابع على هامش المهرجان ضمن عروض هيئة قصور الثقافة على مسرح السامر (أغسطس ١٩٩٢)

اللوحة الأولى

(دراما حركية تجسد بورسعيد ما قبل عدوانه يونيو ١٩٦٧ ثم أثناء العدوان ثم التهجير ثم حرب أكتوبر المجيدة والانتصار فى ١٩٧٣).

اللوحة الثانية

(مكان ما من ريف مصر - الدراويش يودعون زميلهم الشيخ طه)

شنكح : يعنى خلاص يا شيخ طه زهقت مننا؟!

الشيخ طه : زهقت ازاي بقى؟ ده البلد رجعت من سنة بحالها وأنا فضلت قاعد معاكم..

معلوف : ما أنت قاعد معانا يا شيخ .. لازم ترجع بورسعيد يعنى؟! ما رزق هنا رزق هناك..

شنكح : لا بقى يا معلوف ...هناك منطقة حرة ... مش كده .. يا شيخ طه؟!

الشيخ طه : بصرف النظر .. هناك بلدى وأهلى وناسى ..

شنكح : اللى تشوفه يا شيخ طه .. بس اوعى تقطع الجوابات .. ولازم تبقى تزورنا يا شيخ..

الشيخ طه : انشاء الله .. دى عشرة سبع سنين يا جماعة .. وانتم كمان لازم تبقىوا تزورونا برضه .. أنا أول ما أستقر ح ابعت لكم جواب على طول .. أشوف وشكم بخير..

الجميع : ح توحشنا يا شيخ طه .. مع السلامة ..

(يتعانقون)

الشيخ طه : فى بورسعيد منطقة حرة .. قال يعنى زى بلاد برة ..

تعالوا شوفوا وخدوا فكرة .. وأهو تشتروا حاجة بالمرة ..

اللوحة الثالثة

(الممثلون يجسدون صالة جمر ك بأحد منافذ بورسعيد)

مواطن (١) : محدش شافك من يومين يعنى ..

مواطن (٢) : كنت فى مصر فى كام مصلحة كده ...

مواطن (١) : مصالح ويس؟! ..

مواطن (٢) : وتغيير جو ...

مواطن (١) : هنياك يا عم .. اتفسحت واتبسطت ...

مواطن (٢) : يا راجل .. الواحد .. كائنه مخرجش من البلد .. العربيات بتوع بورسعيد

مركنه شمال ويمين بطول شارع الهرم ...

مواطن : شوفت أبو الهول والهرم ؟

مواطن (٢) : أه .. خوفو .. وخفرع ومنقرع .. من هبش .. ومن سرق .. ومن لهط .. كله

هناك يابا ..

(طابور من المواطنين - جنود أمن الموانئ منتشرون بالعصى فى أيديهم -

موظفون جمارك - صياح وضجيج فى كل مكان)

جندى (١) : (يلوح بعصاه مهددا) فى الصف يابنى آدم أنت وهو .. اللى هيخرج من

الطابور هيشوف شغله .. (يقترّب من أحد المواطنين ويذغده) أنا مش رجعتك

قبل كده؟

مواطن : لا .. مش أنا ..

جندى ١ : أنت بتستعبط .. تعالى هنا ... (يجذبه بشدة ويخرجه من الطابور ويدفعه بعيدا)

.. ورينى أنت لابس ايه؟ يا للا اقلع هدومك دى..

مواطن ١ : عيب يا شاويش الكلام ده ..

جندى ١ : يعنى مش عاوز تقلع ؟ .. طيب تعالى كده ... (يجذبه)

مواطن ١ : على فين؟

جندى ٢ : (بلهجة صعيدية) .. جالك تعالى اكده .. يجبى تعالى اكده ..

(يهوى بعصاه على المواطن - يخرجون)

مواطن ٢ : (لمواطن ٣) أعوذ بالله .. بيحييهم منين دول؟
مواطن ٣ : من مناطق التجنيد .. عارف ازاي؟
مواطن ٢ : ازاي؟
مواطن ٣ : يوقفوا المجندين ويقولوا لهم .. اللي بيقرأوا ويكتبوا ويفهموا ييجوا على اليمين..
واللى ما يقرؤش وما يكتبوش وما يفهموش بيجوا على الشمال .. حلو؟
مواطن ٢ : حلو .. وبعدين؟
مواطن ٣ : يا خدوا اللي فى النص ويوزعوهم بقى شوية فى الماتشات وشوية عند الجامعة
وشوية يجييوهم هنا أمن موانى زى دول كده ...
مواطن ٢ : يا سلام ..
(يصمتون بمجرد ظهور الجنديين مرة أخرى)
موظف ١ : (لأحد الشباب) ايه ده؟ (مشيرا للملابس الشاب)
الشاب : دى ؟ .. هدمى ..
موظف ١ : (يكتب قسيمة) روح ادفع القسيمة دى فى الخزينة...
الشاب : ليه يا أستاذ؟
موظف ١ : اتفضل ادفع من سكات ..
الشاب : فهمنى أدفع ليه؟
موظف ١ : (بتهمك) سيادتكم ياباشا لابس طقم ثمنه أكثر من ١٥٠ جنيه .. اتفضل ادفع
أحس ما أصادره..
الشاب : (مندعشا) .. تصادره ؟ .. هو احنافين يا جدعان؟
(يتدخل موظف آخر بينما يقترب الجنود)
موظف ٢ : فيه ايه؟
موظف ١ : البيه لابس طقم تسليم ومش عاجبه يدفع جمرك ..
موظف ٢ : (للشاب) .. مش عاوز تدفع ليه؟ أنت بالطريقة دى بتعطل الموظف وبتهدر حق
الدولة ..
الشاب : أنا مش فاهم حاجة خالص ..
موظف ٢ : لأ .. أنت فاهم ويتستهيل بل .. اتكل على الله وادفع خلينا نشوف شغلنا ..

ياللا يا اخويا

الشاب : حضرتك فاهم غلط .. أنا ابن البلد دى .. ومش معنى أنى لابس كويس .. ببقى بالضرورة ابقى مهرب ..

موظف ٢ : وليه لأ؟

الشاب : (بحدة) ايه رأيك بقى أنا جايب الهدوم دى من ايطاليا وأنا جاي الأسبوع اللى فات وأدى الباسبور .. (يخرج باسبوره من حقيبته يد صغيرة) .. وأنا داخل البلد نزلت أثبت الأجهزة والملابس اللى معايا .. ثبتوا لى الأجهزة وقالوا الملابس لأ .. يعنى نعمل ايه اذا كان نظامكوا كده؟ .. أنا ماشفتش كده فى العالم كله أبدا .. كل اللى جايب معاه هدمتين من برة وييجى يخرج لأى سبب يدفع جمره .. نتحبس بقى !؟

موظف ٢ : عليك نور .. اتفضل ادفع يا ترجع البلد تانى ..

الشاب : (فى حدة) مش دافع ..

موظف ٢ : (للجنود) ودوه لرئيس الوردية يتصرف معاه .. اللى بعده ..

(الجنود يدفعون الشاب الذى يعلو صياحه)

الشاب : انتوا بتتلقحوا علينا منين؟

يخرجون بينما يظهر مواطن آخر يتلفت كمن يبحث عن شخص ما - يتجه نحو موظف والذى يستقبله فى بشاشة)

الموظف ٢ : أهلا يا سعادة البية .. المنفذ منور .. أنا مستنيك من ساعة والله ..

مواطن ٤ : معلش .. أصلى لفيت فى السوق .. جبت شوية حاجات كده .. لزوم الهدايا وأنت عارف بقى المسائل دى .. والبركة فيك ..

الموظف ٢ : المنفذ تحت أمرك .. معاك ايه؟

مواطن ٤ : الحاجة فى العربية برة .. أنا مارضيتش أخش قبل ما أشوفك

الموظف ٢ : أحسن برضه ..

مواطن ٤ : جبت طقم سرفيس وشوية كبايات .. وشوية معالق وشوك وسكاكين .. وبراد كهربائى وكولمان وكام ختة قماش ودستة شباشب وحبة صابون وشامبو ومعجون .. ولبان وخمسة كيلو تفاح وعلبة اريال .. وطقمين جينز .. ويس ..

الموظف ٢ : بس؟!

مواطن ٤ : أه... مارضيش أتقل عليك المرة دى .. قلت حاجة بسيطة كده ع الماشى..

الموظف ٢ : تحت أمرك ... هات العربية

(يخرجان بينما الموظف ١ يفتش أحد المواطنين ويخرج منه قطعة قماش دسها بين ثيابه) ..

الموظف ١ : وقعتك سودة .. أنت لافف؟

مواطن ٣ : دول مترين بس والنبي .. موديههم لأمى الغلبانة .. أصل ما معايشش فلوس أجمرك ..

الموظف ٢ : (ينادى) ياعسكرى .. (يحضر أحد الجنود) خده .. اعمل له محضر فى النقطة .. البية كان لافف مترين ..

الجندى : يا لهو بالى .. مترين بحالهم يا مجرم يا مهرب .. (يمسك بخناقه) قدامى ع النقطة يا عدو القانون ..

(يتجهون للخروج فيقابلهم أحد المعوقين زاحفا فإذا بالجندى يصرخ فيه)

أنت تانى؟

(يهب المعوق واقفا ويطلق ساقيه للريح)

اللوحة الرابعة

اجتماع اقتصادى

مستول ١ : وهكذا .. بعد مرور خمس ست سبع تمن سنين على تجربة المنطقة الحرة فى

بورسعيد ثبت أنها السبب فى كل المشكلات الاقتصادية فى البلد ..

مستول ٢ : مش كده وبس .. دي كمان منافس خطير للإنتاج المحلى ..

مستول ٣ : محلى ؟ ... هو احنا عندنا سكر ؟! .. لذلك أرى اصدار القرارات المناسبة

لترشيد الاستيراد .. أو إلغاء المنطقة الحرة من أصله ..

مستول ٤ : أنا شايف تحويلها لمنطقة حرة انتاجية زى هونج كونج مثلا و

مستول ١ : هو احنا عارفين نصرف انتاجنا احنا ..

منتجه ايه؟ .. بلا وجمع دماغ ..

اكتب القرارات دى

(يعلن)

تحصيل الرسوم الجمركية على كل البضائع المستوردة من المنبع .. حظر
استيراد ١١٣ سلعة موضحة بالكشف المرفق .. تطفيش زوار المنطقة الحرة
وذلك بمعاملتهم معاملة وحشة خالص ..

دراما حركية توضح التدهورالاقتصادى منذ عام ١٩٨٣ حتى عام ١٩٨٧ وهو زمن

اللوحة الخامسة

(ناصية شارع فى بورسعيد - مقهى يقابله عدد من الباعة الذين يعرضون بضاعتهم
على الأرصفة - المارة والزبائن هنا وهناك .. أبو السيد صاحب المقهى يكنس ويرش مياه
أمام المقهى ... ينادى صبيه)
أبو السيد : وله يا خله .. خف شوية .. امسح الترابيزات وغير مية الجوز ..
خلة : اصطباحتك قشطة بالصلى ع النبي يابا
أبو السيد : يا بركة الجمعة والجماعة .. والنبي صاحب الشفاعة ...
(يظهر أحد الزبائن يحمل تحت ابطة ملف أوراق)
أهلا بالأستاذ مصطفى .. يا صباح الفل .. وشك ولا القمر
مصطفى : وشك الأحسن يابو السيد .. (يجلس) معسلة يا خلة ..
خلة : ألسطة يا درش .. أجدع معسلة ...
أبو السيد : ايه يا أستاذ ؟ .. لسه شاييل الهم؟
مصطفى : (يتنهد) .. ومين مش شاييل ياريس؟
أبو السيد : ياهه .. كتير قوى مش شاييلين .. ولاهما حاسين بحاجة ..
مصطفى : مسيرهم يحسوا يابو السيد .. اشمعنى أنت حاسس؟

أبو السيد : أنا حاجة تانية يابنى .. السكينة ماسرقتنيش .. والبريق مازغلش عنيه..

خلة : المعسلة يا صااص ..

مصطفى : أنت ماسمعتش آخر حاجة يابو السيد؟

(ياخد الجوزة)

أبو السيد : عن ايه؟

مصطفى : ح يعملوا مينا فى دمياط

أبو السيد : مش يشغلوا المينا اللى هنا الأول .. دى حاجة غريبة يا جدع .. تلاقيهم

يعملوها عشان يعطلوها برضه ..

مصطفى : عارف أنا جاي منين..

أبو السيد : من الشغل ..

مصطفى : هو أنا رحت الشغل عشان أجى منه؟

أبو السيد : أنا قلت يعنى أنك مضيت حضور وخلعت زى غيرك ..

مصطفى : مش عيب يابو السيد .. هو أنا كده برضه ..

أبو السيد : أmaal جاي منين؟

مصطفى : جاي من عند (سييس) ..

أبو السيد : ع الصبح كده؟

مصطفى : أنا مقدم عارضة النهارده .. (يتنهد) .. امبارح الضهر كنت هناك .. عند

ديليسيبس قلبى اتقطع يابو السيد .. المينا مشلولة .. كتبت حته قصيدة ..

أبو السيد : طبعا يا عم جو شاعرى ..

مصطفى : شاعرى مين .. ده جو ييكى ..

أبو السيد : قول سمعنى يمكن نغنيها سمسمية .. اتنين شاي يا خلة ..

مصطفى : كان الحجر قاعدة لتمثال اسمه (سييس)..

كان فيه كازينو الشمال

فاضى ومهجور الكراسى ..

على اليمين لفيت براسى ..

شوفت الممر ..

خالى الممر..
والشمس فى كبد السما والجو حر ..
بصيت بعيني للبوغاز
للجونة .. لرصيف الفلايك
كان زمان هنا فيه فلايك..
لنش رايح .. لنش جاى ..
بحرى واقف ع القزق يخطف له شاي ..
والتجار البمبوتية بيعرفوا كل اللغات ..
والسفافين صفارات ..
من كل جنس ولون تحددهم رايات
رجالة عمال الرباط
من شيمة وراشيمة
لنور وشمندورات ..
وكله بتقرغ بضايح م الصالات ..
وصوت موتور الشاحنات ..
دخان وريحة شكمانات ..
كان أكل عيش ..
وقروش مبللها العرق ..
وخلص مفيش
الرزق من مدة اتشنق ..
مصطفى : شايف شواهد من حديد الأوناش كائى فى مقبرة..
مدفون فى جوفها حياة وكانت زاهرة ..
مافضلش منها .. الا ذكرى عابرة ..
والموج بيلطم ع الحجر .. وفى رجعتة ..
يشهق .. واسمع شهقته .. مع صوت أنين ..
وفوقه طار نورس حزين ..

خلة : يا سلام يا أستاذ .. صحيح الكلام زى الطعام .. وأنت كلامك آخر حلاوة ..

أبو السيد : منك لله يا مصطفى .. فكرتني وقلبت على المواجه ..

(بياع كرتونه يحاور زميله)

بياع ١ : الحكاية دى ايه يا عربى ؟

بياع ٢ : حكاية ايه يا دسق ؟

بياع ١ : مابعنناش بتعريفه ياجدعان ..

بياع ٢ : ومين سمعك . أنا امبارح واللى خلقك .. كنت ح اطلق الولية .. وأرمى العيال فى

الشارع ..

بياع ١ : ليه يا وله .. وده ينفع ..

بياع ٢ : محدش حاسس باللى احنا فيه .. طلباتهم مابتخلصش أبدا .. أقول لها ياولية

بكرة تفرج .. تقوللى .. خلاص . تغدى العيال بكرة تفرج بالصلصة ؟ .. لا وايه

؟ .. ده فيه موضوع عجيب ياجدعان بيحصل عندنا هناكل موسم امتحانات ..

آه .. عارفين ايه .. هو ؟

بياع ٢.١ : ايه ؟

بياع ٢ : الجماعة المراقبين ..

بياع ١ : بتوع التموين ؟

بياع ٢ : ما تصحى يا دسق .. تموين مين ؟ .. بقولك المراقبين بتوع .. الامتحانات ..

بياع ١ : مالهم ؟

بياع ٢ : عاملين فردة ع العيال بتوعنا ..

بياع ١ : ازاي بقى ؟

بياع ٢ : زى ما بقولك كده .. الجماعة بول فاكيرين بورسعيد دى ايه ؟

هونج كونج .. ولا تايوان ؟ .. يقوموا يجولنا من محافظات تانية عشان يراقبوا

على التلاميذ فى الامتحانات .. ويقدروها اعارة ..

بياع ٢ : اعارة ايه يامتولى ؟

بياع ٢ : أصل أنت ما عندكش عيال .. ولسه طرزان .. وماتعرفش حاجة .. الحكاية يا

سيدي أن كل واحد من الناس دى ييجى وفى جيبه لسته طلبات .. من الفيديو

لغاية اللبان ..

بياع ٢ : معقول يا جدعان؟

بياع ٣ : وحياة عيالى زى مابقولك كده .. أمال أنا كنت مولع الدنيا امبارح ليه؟ .. البت الكبيرة عايزه عشرين جنيه . عشان هيلموا من بعض فى المدرسة ويشترخوا للمراقبين تفاح ومعجون وحكايات وروايات .. وآل ايه .. فيه واحد عاوز بيرسول .. عشان الاستراحة فيها ناموس ..

بياع ١ : يا عياقته

بياع ٢ : أمال ايه .. ما هى منطقة حرة..

بياع ٣ : لا وأنت الصادق دى مصيبة حارة .. اسكت يا عم الله يصلح حالك..

(يمسك أجندة وقلم ويهم بالكتابة) بلا وجع قلب..

بياع ١ : ايه يا سيدى .. (متكهما) .. هتقفل دفتر اليومية؟

بياع ٣ : بتتريق يا جاهل .. يا أمى ..

بياع ٢ : أمك مين يا جدع .. ده منظر أم ده ؟ ..

بياع ٣ : ربنا ما يحرمك م العبط أنت كمان - أمى يعنى بصمجى يا فالح .. فهمت؟ .. ثم أنا باكتب يومياتى ومذكراتى بصفتى راجل متعلم وأحب أسجل كل حاجة يوم

بيوم .

بياع ١ : زى الجماعة الأدبا الكبار يعنى .. هتعملي فيها نجيب محفوظ؟

بياع ٣ : لم بضاعتك أنت وهو ويلاش رغى .. الناس خلاص شطبت .. ولا ناويين تسهرخوا صباحى؟

بياع ٢ : صباحى .. صباحى دي كانت زمان .. ألا بقولك ايه متولى يا مثقف أنت اقرأ لنا كده الحاجات اللى بتكتبها دى ..

بياع ١ : آه .. والنبي سمعنا وحياة أبوك ..

بياع ٣ : ليه؟ .. ماتسيبنى أقفل اليومية ..

بياع ١ : أنت زعلت؟ .. ماناس بركة الا أنت .. قول بقى وخليك حلو ..

بياع ٣ : ماشى .. شوفوا بقى .. هقرا لكم الأسبوع اللى فات .. يوم الجمعة .. (بمصاحبة تشخيص)

الضهر فات والعصر فات
كالعادة قاعدين بطالين
باسأل .. زهقت من السكات
هما الزباين مفقودين ..
يمكن يكون الحلم مات..
ايه الحكاية يافهمانين...؟
يلحقنى اذان العشا ..
وملميناش حق العشا ..
ليت بضاعتى وفرشتى ..
ونويت أروح عشتى ..
قربت علي شارع الحميدى ..
الفرن مزحوم بالبشر ..
وكلهم واقفين طابور ..
حببت أزوغ .. شد ايدى ..
وبعينه بحلق لى وزغر ..
وقاللى ايه؟ .. أقف فى دور
بصراحة صورته وهيئته ..
وعلو صوته وبصته ..
خلونى عديت الأمور أحسن ما تقلب دندرة..
أو مسخرة .. ويحصل كسور ..

السبت :

ولا لاعب السيرك فى زمانه ..
مشيت وكل الأرض روبه ..
اشحال فى أمشير ويجنانه ..
واحنا النهارده فى نص طويه ..
هانت .. وهوصل عشتى ..

فى الوحل لزقت جزمى ..
ضاع التوازن وانكفيت ..
وهدومى بالوحل اتملت ..
وحمدت ربى عشان لقيت ..
الاكل م الوحل .. فلت ..

الأحد :

البرد قارص والشتا ما بطل نزول ..
والعشة حتبوش والسما بتحدف سيول ..
معلوم طويل ليل الشتا ..
وأم العيال متكلفته ..
مسكينه مهدودة ..
أحلامها محدودة ..
كان نفسها فى تكييف ..
أجلته أنا للصيف ...

الاثنين :

ضاع فى المحافظة عشان السكن ..

الثلاثاء :

بالصدفة أنا اتمشيت
فى شارع الروضة ..
حقيقى أنا اتغميت ..
أسعار آخر موضة ..
معذورة ست البيت ..
والشكوى مرفوضة ..
انقلبت الموازين ..
معادلة صعبة مين ..
ده أكيد بقى أن أمى ..

أجدع وزير تموين ..

الأربعاء :

فى الميكروباص حسيت أنى راكب خلاط ..
نزلت دوغرى مشيت ..
شوفت الشارع نافورات
على كل ناصية لقيت
كام حفرة ومطبات
وبعدها بكام بيت ..
زفت وبابور زلط..
وشلة م العمال ..
أنا قلت طيب عال ..
حلقى الجواب لسؤال
سألت واحد قال :
ماتبطلوا التشكيك ..
دى حكومة مظلومة ..
ازاى بقى تعديك .. دى خطة مرسومة ..
مش حبر فوق الورق ..
ده مال وجهد وعرق
نحرت جميع الطرق .. وفى مدة معلومة ..
مش فوضى ولا دربكة ..
ولا هيصة ولا بعككة ..
أو تصريحات فبركة ..
لا مجارى ولا تليفونات
ولا مية ولا كابلات ..
ماتبطلوا الفزلكة ..
بس انتوا قولوا يارب ..

لكل أسرة مطب ..
فى مشروع الهشكة ..
الخميس بالليل جاني شاويش
قال بينا النقطة ..
أنا قلت له يا شاويش
أكيد هناك غلطة ..
القصد .. روجت معاه ..
لقيت بلاغ ضدى ..
وجنحه يا أسفاه ..
يا باشا .. مش قصدى ..
قال : فى النيابة تقول
كل اللى على بالك ..
أنا أصلى مش مسئول ..
اديني اقوالك ..
بتمضى على شيك ليه؟
لما مالکش رصيد ..
أنا قلت : مين ؟ .. فين؟ .. ليه؟
اوصف لى بالتحديد ..
قال لى : باسم فلان ..
أنا قلت : آه .. التاجر ..
الله يجازيه .. سهران ..
ازاى ما هوش عاجز ..؟
قال : تقبل التسديد ..؟
أنا قلت : أيوه أكيد ..
آخر سؤال قال لى ..
هل لديك أقوال أخرى ؟

أنا قلت : على فكرة ..
أمشى واجيك بكرة ..
أصلى بصراحة تعبت ..
قال : لا .. تبات للسبت ..
بياع ١ : (لبياع ٣) .. مش بلاش كده ..
بياع ٣ : بلاش ايه ؟
بياع ١ : أنت فاهم وأنا فاهم ..
احنا برضه نفهمها وهى طيارة يابا ..
بياع ٣ : مش فاهم برضه ..
بياع ١ : هستعبط فيها؟ .. بقى أنت ملبسنا الغمة المدة دى كلها .. وعامل ببيع كرتونة
وأنت قاعد تكتب تقارير للحكومة وتقوللى يوميات ..
بياع ٢ : هى الحكاية ايه بالضبط ..
بياع ١ : على الطلاق الولد ده مخبر ،

اللوحة السادسة

هيسة الانتخابات

هتيف ١ : انتخبوا مرشحكم المفضل (بلهجة اعلانية) عبد الحليم بتنجان .. رجل لكل زمان
وديع فى البرلمان .. مسالم كالحمل .. ورمزه الجمل ..
(تصفيق)
المرشح : اخوانى (على طريقة وردة) وحشتونى وحشتونى وحشتونى ..
الهتيفة : أهلا ..
المرشح : بقى لنا زمان ماشوفناش بعض .. من أيام الانتخابات اللى فاتت وانشاء الله
مش ح أشوف وشكم الا فى الانتخابات اللى جاية ..
هتيف ٢ : أيها المواطنون .. خيبة الأمل راكبة جمل .. صوتكم مع المرشح الجريء ابن
بلدكم الرجل الأخضر ..
(تصفيق)

المرشح : يا جماعة الحل فى الزراعة .. سأطالب بإلغاء المنطقة الحرة وردم قناة السويس وتجفيف بحيرة المنزلة وهدم البلد وتحويل أراضي المحافظة إلى أرض زراعية...
(تصفيق وغناء)

هتيف : انتخبوا الراجل الأخضر .. رمز كوز الدرة ..

الجماهير : تنتخبوا مين؟ الراجل الكوز . تنتخبوا مين؟ الراجل الكوز ..

المرشح ٢ : اونطة .. احنا بتوع دلوقتى .. احنا رجال الساعة .. دقت ساعة العمل الثورى .. لتبليط البحر و ..

المرشح ٤ : الساعة وقفت يا اخوانى .. طلعت روسكوف فيها براغيت ..

أنا المستقلا .. أنا بتاع الانفتاح ورمز المفتاح ..

(يغنى) سرقوا الصندوق يا محمد لكن مفتاحه معايا..

الجماهير : (تردد) سرقوا الصندوق يا محمد لكن مفتاحه معايا..

المرشح ٥ : (يفسح مجال بين الجماهير) وسعوا للرمز بتاعى ..

(يظهر ثلاثة أشخاص يشكلون تمثال القردة الشهير لا أسمع لا أرى لا أتكلم)

أنا الراجل الساكت مرشح حزب الأغلبية حزب ماليش دعوة .. أبو الهول ..

٧ آلاف سنة حضارة .. لا أسمع . لا أرى .. لا أتكلم .. أنا أعمل فى صمت أن

برنامجى الانتخابى محدد فى نقطة واحدة .. سأسعى بفضلكم لتحقيقها الا

وهى تغيير النشيد الوطنى من بلادى بلادى إلى - يغنى) وأنا مالى وأنا مالى

وأنا مالى وأنا مالى يا بوى وأنا مالى ..

(المعلم أبو السيد يحدث اثنان انتحوا به جانبا)

أبو السيد : يا جماعة انتخابات ايه؟ .. أنا ماليش فيها .. أنا لا باعلق يفت ولا يحزنون ..

وبصراحة كده .. أنا مابعملش عندى قاعدة لأى مرشح ..

زيون ١ : يابو السيد استفاد لك قرشين .. الراجل هيعمل القهوة مقر انتخابى كام يوم

والسلام ...

أبو السيد : سلام ايه يابو سلام .. هو هيستحمل ايه ولا ايه؟ .. ده السلام ده غلبان قوى!!

زيون ١ : أنت هتعمل خمارة من زبينة ليه معلم؟

زيون ٢ : بصل بخمسة .. بخمسة بصل .. قلت ايه؟

أبو السيد : قلت أتمشى أنت وهو من هنا .. ومحدث يهوب هنا تانى ..

(يقفون ...)

زيون : طيب ماتزقش .. الله ..

خلة : (يهب للوقوف بجانب المعلم) .. ياللا فرجنا على مشيتك يايا (يدفعه ..) احنا مش

ناقصين بلاوى يا خويا .. انتوا حتسرحوا علينا؟

(يخرجون)

أبو السيد : أيوه ما هو موسم .. الأشكال دى مانشوفهاش الا كل موسم انتخابات ..

هتيفة وكداين زفة ..

خلة : ماتزعلش نفسك .. أهم غاروا فى ستين داهية ..

زيون ٣ : قشطة يا خلة .. شوية شاي من ايدك الحلوة ..

زيون ٤ : جرى ايه يا أبو العربى؟ . قول يا باسط .. أنت هتزعزل نفسك ليه؟

أبو السيد: أنا محدش يقدر يزعلنى واللى خلك .. بس الواحد مرارته انفقت .. المرشح

من دول ماتشوفش وشه الا الأيام دى .. وتنتهى الهيصه .. هوب . فص ملح

وداب .. لا تشوفه هنا ولا فى المجلس .. قسم ياعم جابر خيلنا ننسى ..

(تقاسيم سمسمية) معسلة يا خلة .. عاوز أكح ..

خلة : ألسطة ياريس ..

(عوضين وسويلم يتحاوران ويشربان الشاي)

عوضين : هاودنى واسمع كلامى .. سيبك من كار الصياده ده .. وهات العيال وتعالى

هنا ..

سويلم : آجى فىن بس يا عوضين؟ هو البلد ناقص ناس؟ .. ولا يعنى البلاطوة فايز منهم

حاجة؟

عوضين : طول عمر كده يا سويلم يا بن نعمة الله .. دماغك ناشفه ومخك زنج ..

سويلم : اسكت يا عوضين .. أنت عاوزهم فى البلد يتمقلتوا على؟ .. ده كانت النسايمه

كليتها ما يبقلهاش سيرة الا أنى ..

عوضين : (بحدة) .. هو أنت أول اللى جم ولا آخرهم ؟ .. أنت هتشتغل بدرايك أى شغلة

ولا أنت أقل من أبو سيد أحمد السيسى؟ .. أهو بقى سواق ونش قد الدنيا ..

مين كان يصدق أن أبو سيد أحمد اللي ما يعرفش يسوق حمار .. بيبقي سواق
فى الجمرک ..

سويلم : ودى شغلانة تكسب؟

عوضين : ألا تكسب .. دى تكسب قوى قوى .. أهو بعد ما كان ساكن فى عشة ع الكنال
الداخلى .. عارفه ؟

سويلم : أيوه عارفه .. مش اللي فيه المعديّة أم اتنين ميلم دى ؟

عوضين : لا .. دي كنال السويس بتاعة السفاين الكبيرة ..

سويلم : أكبر من لنش المطرية يعنى

عوضين : بزمان .. نرجع مرجوعنا لابو سيد أحمد .. صاحبنا ساب العشة

سويلم : (مقاطعا) شوف الهيافة .. أبو عقل خايب يسبب العشة وينام فى الشارع؟ .. بالك

يا عوضين .. أنا ياما نصحتة لوجه الله وقلت له يخليه فى البلد وما بيعش داره ..

ما سمعش كلامى .. رفض النصوحة .. وأهوانام فى الشارع أهه ..

عوضين : نصوحة ايه وشارع ايه يا سويلم .. الراجل ساب العشة وسكن فى البنك ..

سويلم : بنك؟ .. لا .. ده اتجنن بقى يا عوضين ..

عوضين : ليه يا سويلم؟

سويلم : فيه حد فى الدنيا يسكن فى البنك؟

عوضين : أيوه .. ناس كتيرة ساكنة فى البنك؛ .. فيها ايه دى؟

سويلم : لأبقى .. اسمع يا عوضين يابن كمونة .. أنا صحيح من النسايمة مركز المنزلة

دقهلية .. واحلف بغربتى لورحت العجيرة .. لكن بافهم كويس قوى .. البنك

نوعين .. بنك التسليف الزراعى وده محدش يسكن فيه .. والبنك الأهلى بتاع

شهادات الاستحمار .. و ..

عوضين : أولا اسمها شهادات الاستثمار .. مش الاستحمار ..

سويلم : أنا ما قولتش الاستثمار دى .. أنا قلت شهادات الاستثمار علشان هما بيعمروا

بيها البلد ..

عوضين : آه ..

سويلم : فهمت ؟

عوضين : اللي تشوفه .. المهم أنا قصدي أن أبو سيد أحمد ساكن فى مساكن بنك الاسكان .. فهمت مساكن اسمها كده .. مش فى البنك ذات نفسه طاو عنى وتعالى هنا .. أنا بطريقتى هجيب لك تصريح العشة .. ماتحملش هم .. بس أنت وافق والباقي على الله .. قلت ايه؟

سويلم : ألا أنت ساكن فى دلوقتى؟

عوضين : فى الكويت..

سويلم : لا حول ولا قوة الا بالله .. بقى أنت كل يوم تركب طائرة رايح جاي .. عشان تيجى الشغل . ده غير الفيزة وتصريح السفر وال .. هو أنت بتكسب كام فى اليوم؟

عوضين : فيزة ايه وهباب ايه يا سويلم .. ما تفهم بقى يا جدع.. أنا ساكن فى حى اسمه الكويت .. مش فى دولة الكويت .. مساكن يا سويلم اسمها حى الكويت .. نص مركز المنزل ساكنين فيه.. فهمت ؟

سويلم : وأنا برضه بقول .. طيب نورنى يا عوضين .. ألا أنا عشتى هتبقى فى؟ .. أنا بقول لو مافيش مكان فى حى الكويت ده .. خليفها فى السعودية ..

عوضين : تانى يا سويلم : مافيش حى اسمه السعودية هنا .. عشتك هتكون فى مدينة العرايس ..

سويلم : (يهب واقفا) .. عوضين

عوضين : ايه يا سويلم ..

سويلم : أسيب النسايمة مركز المنزل دقهلية وأجى هنا .. وقلت ماشى لكن أسيب ستوتة أم العيال وتجاوزنى وابقى عريس وأسكن فى مدينة العرايس دى .. لا .. يابن كمونة..

(اثنان من الزبائن يتجاذبان الحديث)

زيون ه : أنا فوتك فى الكلام .. أنا أول ما جيت من نبروه .. اشتريت هنا محل مكوجى ومحل الحلاق اللي جنبه .. وفتحتهم على بعض .. وتاجرت فى القماش الجاهز .. جوز أختى دمياطى متيسر وعنده ورشة نجارة كبيرة .. اتسكتر عليا اللي أنا فيه .. مع أنه مبسوط وأغنى منى

زبون ٦ : طمع الدنيا بقى ..

زبون ٥ : القصد .. اشترى قهوة هنا وقلبها معرض موبيليا .. يصنع فى دمياط ويعرض هنا .. والدنيا ما بتديش محتاج ..

زبون ٦ : فعلا .. أنا أول ما جيت م الزقازيق اشتريت بيت قديم وهديته .. وبنيت لوكاندة وفتحت المحلات اللي تحتها لحسابى .. وتاجرت جملة وقطاعى واشتغلت فى كل حاجة تخطر على بالك .. الحال كان عال العال الأول .. لكن دلوقتى السوق زى ما أنت شايف .. ومش عارف ألم فلوس .. ويفكر أبيع الجمل بما حمل وارجع الزقازيق ولا أروح على اسكندرية أو السلوم .. خصوصا بعد فتح الحدود مع ليبيا .. الخط هيشغل تانى ..

زبون ٥ : ومين سمعك .. بس الواحد يلم فلوسه .. وبعيدن يحلها ربنا ..
(يظهر أحد الأفراد مندفعاً نحو الزبون ٦)

الشخص : الحق يا حاج بسرعة ..

زبون ٦ : اللهم اجعله خير .. فيه ايه ياوله؟

الشخص : فيه محضر جاى يحجز عليك .. بيقول عشان مديونية البنك ..

زبون ٥ : هية مديونية كبيرة؟

زبون ٦ : عشرين ألف جنيه .. استر يا رب ..

زبون ٥ : عشرين ألف بس ؟ أmaal اللي بيهربوا ملايين محدش بيحجز عليهم ليه .. يا خراب بيتك يا سقعان ..

زبون ٦ : جت الحزينة تفرح .. ملقتلهاش مطرح .. يستاهل اللي جراه .. فيه تاجر فى الدنيا يبقى اسمه السقعان؟

(بياعين الكرتونة)

بياع ١ : ألا أنت ما عرفتتش اللي حصل؟

بياع ٢ : حصل إيه؟

بياع ٢ : الولد دسوقى اتمسك علي المنفذ ..

بياع ٣ : يخرب بيت عقله .. كان لافف ؟

بياع ٢ : لا .. كان عامل شكمان .. ومخى فى مخزن سرى فى العربية ..

بياع ٢ : وبعدين؟

بياع ٣ : ولا قبلين ...عملوا له محضر .. وحولوه على النيابة .. وشوف أنت بقى كفالة ومصالحة مع الجمارك .. و .. ومصادرة العربية وسجن .. وفيلم محروق مالوش لزوم يا بابا ..

بياع ٣ : ياما قلت له يادسق بلاش السكة دى .. يقوللى .. المخبرين فى جيبى يا جدع .. لا الوردية متباعة .. وقعد يتحنجل لما وقع ..

بياع ٢ : الموظفين اللي بيتعاملوا مع المهربين لما يقع اللي شغال معاهم ينسوا اسمه وعنوانه .. آه ولا كائنهم يعرفوه ..

بياع ٣ : طبعا .. أأل يروحوا فى داهية؟ .. مهرب يروح .. عشرة ييجوا .. واللى يقع يسد .. (يندفع فجأة شخص يصرخ)

الشخص : الحملة ياله .. لم ياله .. المرافق ياله ..

بياع ٣,٢ : مرافق ؟ .. فلسع ياله

(يخرجون)

اللوحة السابعة

(قهوة أبو السيد)

أبو السيد : (يغنى موال)

فى الحى أنا زمار

غنيت بالحنى

ياما قلت لك أشعار

الحلم فى أغانى

وغنايا مش تفاريج

الناي فى ايدى جريج

بيقول بكا وتباريج

ولا أنتى سمعانى

(يظهر الدراويش .. يلقون التحية على رواد المقهى ويجلسون)

أبو السيد : شوف يا خلة الناس تشرب ايه ..
خلة : ماشى يا معلم .. (يتجه إلى الدراويش) ؟ منورين يا حلوين؟
معلوف : (بحدة) ايه منورين دى ؟ . أنت هتتألط علينا ولا ايه؟ .. شايفنا كلوبات يعنى ..
ولا تكونش شايفنا كلوبات يعنى ..
أبو السيد : مالك يا خلة ؟ .. مزعل الزباين ليه؟
خلة : أنا زعلت حد .. ده حاجة غريبة .. بقولهم منورين .. الأخ مزعل نفسه قوى ..
معلوف : اسمع يا جدع يالى اسمك قلة أنت ..
خلة : لا .. دانت حنوة بقى .. اسمى خلة مش قلة .. خلة يعنى ابراهيم .. بالاسبانيولى ..
معلوف : يا حلاوة يا ولاد .. هى ابراهيم عندكم تبقي .. خله ؟
أبو السيد : (ينضم اليهم) أهلا وسهلا .. شرفتوا البلد . باين عليكم مش من هنا ..
الشيخ شنكح : الحقيقة احنا ضيوف ..
أبو السيد : يا أهلا .. نورتوا بورسعيد والله .. ولا بلاش النور دى مادام بتزعل الأخ ..
(يشير إلى معلوف) تحبوا تشربوا ايه؟
الشيخ شنكح : نشرب الموجود ..
أبو السيد : خيرك موجود .. (لخلة) شوف يا خله الناس تشرب ايه؟
معلوف : بلاش قلة ده ..
خله : يا عم دماغك ..
معلوف : مالها دماغى .. هه؟
أبو السيد : ده الخله ولد جدع وجبوب .. يا عم روق كده .. أهلا وسهلا .. يا حاج
(الشيخ شنكح يقاطعه)
الشيخ شنكح : شنكح ..
أبو السيد : نعم ؟
الشيخ شنكح : اسمى يعنى .. أنا اسمى الشيخ شنكح ..
خلة : ومش عاجبك خله ؟!
أبو السيد : أهلا وسهلا ..
الشيخ شنكح : محسوبك صييت قد الدنيا .. ودول بقى . الجوقة بتاعتى ..

أبو السيد : لابقى .. ده احنا حبايب .. أصل احنا كده صحبجية وفنانين برضه .. بس ع

السسمية ..

معلوف : يعنى ايه صحبجية؟

أبو السيد : جوقة برضه ..

معلوف : أيوه .. أيوه .. بس بالأفرنجى يعنى ..

الشيخ شنكح : والسسمية دى زى العود كده؟

أبو السيد : لا .. زى دى كده ..

(يعرض عليه آلة السسمية)

معلوف : دى سسمية ؟

أبو السيد : أيوه ..

معلوف : بتاكلوها ازاي دى؟

الشيخ شنكح : يخلص .. الله يكسفك .. دى مابتاكلش .. دى بيعزفوا عليها زى العود ..

والربابة

أبو السيد : هات يا خله مشاريب ومعسل هنا علي حسابى .. الجماعة دول ولاد حظ زيننا

ولازم نكرمهم..

خلة : ماشى يا معلم .. (للدراويش) .. تحبو تشربوا ايه؟

الشيخ شنكح : شاي .. و.. و... ينسون .. الشاي للدماغ والينسون عشان الحنجرة..

معلوف : أنا أشرب عرقسوس ..

خلة : هنا قهوه يا سيدى .. مش معصرة ..

معلوف : بيقى شاي وينسون .. زى الشيخ شنكح ..

خلة : (لمعلوف) وأنت تشرب ايه؟

معلوف : أشرب م القله ..

خلة : م القلة ؟

معلوف : أيوه .. مش عندكوا قلة برضه .. ولا الاختراع ده لسه ماوصلكوش؟

خلة : لا .. فيه زير ..

معلوف : ياسنة سوخة .. واشرب بيه ازاي ده ؟

خله : فيه اختراع اسمه الكوز .. ولا لسة ماوصلكوش برضه؟ .. أنا هوجع دماغى ليه ..
طقم شاي وخالص..

الشيخ شنكح : (للمعلم) ألا يا معلم لو سمحت يعنى .. نوصل للعنوان ده .. ازاي؟
أبو السيد : (يتناول ورقة ويقرأ) مدينة العرايس .. عشة رقم .. ده عنوان مين ده ؟!
الشيخ شنكح : ده عنوان زميلنا الشيخ طه السعيد ..كان مهاجر عندنا .. بس تلاقيه
دلوقتى ربنا فتح عليه .. بقى ساكن فى مدينة العرايس .. أصله ابن حلال أكيد
عشته أحسن من عشش رأس البر ألف مرة..

معلوف : كتير قوى ..
أبو السيد : (يكلم نفسه) .. أه .. ده باين عليهم معندهمش فكرة عن البطاطس .. ده
الجواب باين من عنوانه .. (بصوت عال) .. يا خله .. (ينتحي به جانباً) اصحى
معايا شوية .. أخطف رجلك فى تاكسى وروح عشش الجبل .. شوف العنوان
ده وهات معاك الشيخ طه ده باين عليهم على نياتهم قوى ..

خله : طيارة .. (يخلع الفوطه).. (يخرج)
أبو السيد : أهلا .. أهلا.. بحباينا ..

الشيخ شنكح : الدراويش ..
أبو السيد : نعم ؟

الشيخ شنكح : كلتنا كده .. اسمنا الدراويش ..
أبو السيد : واشمعنى الاسم ده بالذات ..

الشيخ شنكح : أصل أول ما عملنا الجوقة .. سميناهها جوقة الدراويش ومن يومها واحنا
كلتنا كده اسمنا الدراويش يعنى .. أمال أنت اسمك ايه يا معلم؟

أبو السيد : سامى أبو السيد القهوة دى بتاعتي .. وباشتغل فيها من قبل حرب ٦٧ وأيام
التهجير .. الله ما يعودها .. ماقلتهاش .. استبقيت هنا .. وكنت فاتحها
للمستبقيين والعساكر بتوع الجيش .. ولادى هاجروا اجبارى زى كل الناس
ورجعوا بعد حرب أكتوبر والبلد بقت منطقة حرة .. أنا جانى ألف واحد .. اللي
عاوز يشتري القهوة .. واللى عاوز يأجرها واللى عاوز يشاركنى .. ويدفعوا شئ
وشويات عشان يعملوا بوتيك .. لكن أنا أبدا ما بيعدينش عن قهوتى ألا الموت ..

معلوف : وتبيعها ليه؟ .. هو أنت لاسمح الله محتاج حاجة؟ تلاقيك كده بسم الله ما شاء الله عندك عربية. وساكن فى عشة قد الدنيا وعندك رصيد فى البنك .. أمال ايه
هى عربيتك مرشيدس خنزيرة ولا تمساحه؟
أبو السيد : لأ جاموسة .. ده أنتوا واخدين فكره منيلة خالص .. انتوا فاهمين المسألة غلط..

ال دراويش : غلط

أبو السيد : أيوه غلط .. أهل البلد دى مظاليم .. دول ناس عاדיين جدا .. محدش عنده
اللى بتقول عليه ده .. ولا حتى أقل من ده خالص .. صحيح فيه ناس استفادت
من وضع البلد .. وأساعوا لبورسعيد كتير قوى .. لكن صدقوني أغلب الناس
تعبانة بتشقى وتطفح الدم عشان تاكل بس .. ده حتى فيه ناس مش لاقية
تاكل..

معلوف : أيوه .. أيوه يا خويا .. أنت فاكرنا هنعسلكم ؟

فيلسوف : بطل هباله يا معلوف (لأبو السيد) أمال يعنى الهيصة دى كليتها ع الفاضى ؟
أبو السيد : اشاعة وحياتك كذبة الناس صدقتها .. شوية بهرجة .. اللى لحق يلهم حاجة
لهف واللى مالحقش .. بيعبى الشمس فى قرايز أقول لكم على حاجة؟

ال دراويش : قول ..

أبو السيد : عمرنا ما شوفنا الطوابير الا مع المنطقة الحرة .. أول ما عملوها كبست علينا
الناس من كل حتة هرجلة .. مفيش سكن لاولاد البلد .. من اصله .. الكل
عمل عش الربع من البلد والباقي أغراب ألوفات وافدة علي البلد وألوفات زوار
يوماتى الدنيا ولعت .. طوابير علي كل حاجة .. السمك اللي كان يترمى الضهر
على الكنال الداخلى بقى محدش لاقية والاسعار فى السما .. ومش عاجبك
اخبط راسك فى الحيط .. كنا زمان عارفين بعض .. النهارده محدش عارف
حد .. سمك بياكل فى بعضه الكبير بياكل الصغير .. واحنا البطاخيش .. يعني
سمك صغير قوى قوى ..

الشيخ شنكج : ياه .. دانتوا غلابة يا ولداه ..

فيلسوف : صحيح يا ولاد اللى ما يعرفش يقول عدس ..

الشيخ شنكح : أmaal يا معلم .. أهل البلد دى كانوا عايشين ازاي قبل كده ؟

أبو السيد : ياريتها دامت ..

كان البحر رأس مالنا وكان الحب موالنا

وكان على شطه لمتنا وكان من خيريه لقمتنا

وكننا وكان (لحن يتغنى لمين)

المجموعة : (يغنون) يتغنى لمين ولين ولين.. بتغنى لمين يا حمام؟

أبو السيد : (يصرخ) بس .. دى كمان كذبة ..

المجموعة : كذبة ؟؟

أبو السيد : أيوه كذبه..

الحمام بينوح .. يمكن عشان مجروح .. ولا عاشمن أنه.. فى آخر المطافق

مدبوح .. (يحدث نفسه) .. يقولوا حرة؟ .. حرة ازاي وهى محاصرة من كل

حته؟ .. كروين خيام أمن موانى .. والمنافذ شبه بوابات السجون (بصوت

مرتفع) قسم ياعم قسم (يغنى)

يعيش أهل بلدى ..

يعيش يعيش يعيش

يعيش أهل بلدى

وفى جيوبهم مغيث

أى شىء يخلى

المفلس يعيش *

يعيش أهل بلدى

يعيش أهل بلدى فى الحى التجارى

اللى ماشى ماشى واللى جارى جارى

زاحمين الشوارع قافلين الحوارى ..

ولا فيه حد بايع ولا فيه حد شارى

يعيش أهل بلدى عمال الكنال

عشرين ألف شكوى وميت عرضحال

فين المبطية فين الفهلوية
رابط فوق كئالهم وابور وقف حال
يعيش أهل بلدى اللي فى حى ناصر
نهارهم سحابة وليلهم معاصر
وفى الوهم دايمًا عقولهم تسافر
تشوفهم غلابة وعاملين عناتر
ويعيش أهل بلدى فى شرق المدينة
ده صاحب عماير وده صاحب سفينه
كلامهم أونطة وفيه ألف غلطة
ونبن فى مالطة ودانهم تخينة

خلة : قشطة ياحلوين ..

أبو السيد : (لخه) ايه يابنى؟ .. أنت سافرت؟

خه : كان أهون .. المهم اتدليت على العنوان بطلوع الروح .. تقولش فى واق الواق .. بس
الشيخ طه ده .. مش هناك ..

الدروايش : مش هناك؟

أبو السيد : مسألتش عنه ليه؟.

خه : اسأل ليه .. ما هو معلق يافطة على باب العشة مكتوب عليها أنه بيشم الهوا على
البلاج ..

معلوف : البلاج ده بيتاكل ؟

أبو السيد : ده البحر .. الشاطئ .. اسمه كده .. يعنى الشيخ طه بيصيف ..

الشيخ شنكج : ونوصل له ازاى بقى ؟

أبو السيد : مفيش غير انكوا تروحوا البحر وتتمشوا ع الشط لغاية ما تلاقوه..

فيلسوف : فكرك كده؟

الشيخ شنكج : يعنى نمشي منين؟

أبو السيد : خه .. يوقف لكم تاكسى؟

خله : يا عم تاكسى مين؟ ماتمشوها.. دى خطوتين آهى .. أى شارع كده .. (يشاور فى اتجاه البحر) .. يطلعهم ع البحر ..
الشيخ شنكح : والله فكرة أهو نتفسح شوية..
معلوف : آه .. وناكل
الشيخ شنكح : (لأبو السيد) .. متشكرين يا معلم .. تعبك معنا .. وانشاء الله هتشوفك تانى .. ياه .. ده أنت صححت لنا حاجات ..
الراويش : أيوه .. أيوه .. أيوه ..
الشيخ شنكح : (الراويش) دروايش
الراويش : شنكح ..
الشيخ شنكح : إلى البلاج ..

اللوحة الثامنة

(يخرجون من يسار المسرح بينما الشيخ طه مازال يلعب شلبي طاولة فى يمين المسرح)
شلبي : بالحق يا شيخ طه ..
الشيخ طه : ايه شلبي ؟
شلبي : ايه اللي حصل معاك ليلة أول امبارح؟ .. أنا سمعت كلام كتير .. بس ما صدقتش..
الشيخ طه : أنا هقولك . بس مش عشان حاجة .. لا .. عشان أبرئ نفسى أمام الراى العام
شلبي : قول يا شيخ .. قول ..
الشيخ طه : (يتنحج) .. الصبح بعد صلاة الفجر .. لمحت امرأة فى الطريق تجرى .. شعرها منكوش ووجهها كالبدر .. فسألتها . ماذا بك يا شابه ؟ قالت وحياتك أعمل مغروف .. الحقنى راح أموت م الخوف .. فيه حرامى جوه .. الدولار وقاقل على نفسه الباب .. فخلعت الجبة والقفطان .. ونويت أقلد طرزان .. وقلت لها قدامى قوام محسوبك شيخ الفرسان ..

شلبى : يا حلاوتك أنت يا طرزان حثتنا ..
الشيخ طه : خدتها وروحنا على البيت .. على سهوة بعينى رأيت .. سى جوزها وجماعة
معاه نزلوا على يا حول الله .. ويعلقه سخنه اتعشيت قلت فى سرى ياريتنى
ماجيت .

شلبى : أه .. بقى هى الحكاية كده ياشيخ؟
الشيخ طه : مكيدة .. مكيدة وحياتك يا شلبى..
شلبى : مكيدة ..

الشيخ طه : باين عليك مش مصدقنى .. أنت شاكك فى كلامى يا شلبى ..
شلبى : أستغفر الله يا شيخ .. تف من بقل ..
الشيخ طه : (يتف) المهم .. ديلى فى سناني بسرعة وجريت .. فى ثوانى وصلت على البيت
.. فرأيت مراتى على الباب .. فى رشاقة عود اللبلاب .. وبوجه ناصع كالبللور
فشعرت براحة وسرور .. فأقبلت عليها .. وقبلت يديها .. فابتسمت بشفتيها ..
فضممتها بذراعى .. فقالت أى فقلت يا حى ..

شلبى : حى ؟ ... هه وبعدين ..
الشيخ طه : صبرت أغنى وأشرح لها فنى .. (يغنى موال)
ياليل يا عين .. ياليل
لما اتغنيت كانوا الناس يحبونى
ولما اتفقرت كلاب الحى عضونى .. يا .. يا .. يا ليل..

شلبى : ايه ده .. ايه ده .. ياناس؟ .. عدوية فى لندن؟
الشيخ طه : وغلبنى الحياء .. فتوقفت عن الغناء.. وقلت لها يا سيدة النساء سيكون لك فى
الجنة قصرا .. أريد قفطانا وعمة كل شهرا .. وموتوسيلا أتنزه عليه .. ولا يقل
مصروفى كل يوم عن جنيه .. فددقت النظر فى وجهى .. وقالت فى شفقة ..
أنت واخذ علقه؟ .. فقلت لأه ..

شلبى : (فى زهو وخيلاء) قفشتك فى اليك يا حلو ..
الشيخ طه : (متهكما) ودى حاجة تفرح؟ .. هو أنا ماقولتلحكش؟
شلبى : على إيه؟

الشيخ طه : أنا ولا فخر .. صاحب كتاب فن الفك من خانة اليك ..
شلبى : يا سلام ..
الشيخ طه : آمال ايه .. لا .. أنا ولا فخر .. محطم أسطورة أمسك فى اليك وعكك ..
شلبى : والله العظيم؟
الشيخ طه : وحاليا : اعكف على كتابه كتابي الجديد اللي هيحدث انقلاب فى عالم الطاولة .. تريتو .. حل من الدوه ..
شلبى : يا صلاة التبي ..
الشيخ طه : آمال أنت فاكر ايه ..
شلبى : كل ده قضا .. اللعب .. وربنى شطارتك ..
الشيخ طه : (متوعدا) .. طيب يا حلاق الغبرة .. (يرى الزهر) .. شيش بيش (تندفع نحوهم كرة قدم ترتطم بالطاولة وتقلبها على الأرض ويظهر بعض الشباب)
ايه قلة الذوق دى؟
شاب : أنا أسف يا عم الحاج ..
الشيخ طه : أسف يعنى ايه؟ .. تغلط وتقول أسف .. اصرفها فين دى ؟
شاب ١ : آمال عاوزة يقول ايه؟
الشيخ طه : وأنت كمان غلطان .. ايه اللي حشرك يا سيد ..
شاب ٢ : يعنى غلط فى البخارى
الشيخ طه : استحي ياوله .. (يتركوه ولا يعبأ به أحد فيوجه كلامه لشلبى) شاب فلتان .. لا أدب ولا أخلاق .. ولا حياء .. هو ايه اللي حصل فى البلد دى ؟! .. طبعاً أنت فرحان .. الطاولة انقلبت قبل ما أدبك درس .. مالکش فى الطيب نصيب..
شلبى : احنا فيها .. تلعب تانى؟
(يظهر الدراويش ..)
الشيخ طه : (يصرخ) .. يا نهار زى بعضه .. مين؟ .. الدراويش ..
الدراويش : مين ؟ .. الشيخ طه .. يلاحضان .. (يهجمون عليه) والله زمان يا شيخ طه ..
الشيخ طه : لسه زى ما أنتم ماتغيرتوش .. ازيكو يا ولاد ؟ ..
الدراويش : طيبون..

الشيخ طه : ياه .. رجعتوني لورا ييجى عشرين سنة .. اقعدوا ارتاحوا وشموا هوا البحر .. وبالليل بقى هنعيد الماضى ..

معلوف : (يخلق في عيون الشيخ طه) .. تعالى كده .. يا حلاوة يا ولاد .. (ينظر إلى عينيه) ..

الشيخ طه : (فى حيرة) فيه حاجة؟

معلوف : أيوه .. عنيك خضرا ..

الشيخ طه : وايه يعنى؟

معلوف : يعنى لسه ماستوتش .. حلوة دى؟

الشيخ طه : ملعوبة ..

(يضحكون)

الشيخ شنكح : دورنا عليك قالوا بيصيف ..

معلوف : وأنا لما بشوفك باتكيف ..

الشيخ طه : عاملين كده ليه؟ .. ماتقولوا بسرعة جرالكم ايه؟

الدرأويش : (يغنون)

م الفلاحين جينا جينا

علشان نشوفكم بعنينا

من بدرى عاوزين نقابلكم

والمولى حقق أمانينا

م الفلاحين جينا جينا

جينا جينا ياوله

والنبي جينا

ساعة ماعدينا ع المنفذ

شوفنا صحيح حاجة تنرفز

أطفال تصرخ وتولول

حريم يا ولداه تتبهدل

عسكر فى ايدهم خرزانة

أيوه .. أيوه .. أيوه
جمرك تقولش فى سلخانة
أيوه .. أيوه .. أيوه ..
م الفلاحين جينا جينا
جينا جينا يا وله
والنبي جينا
قابلنا واحد بلدينا
تاجر كبير قد الدنيا
حلف يمين لا يغدينا
وأكلنا جمبرى وكابوريا ..
والأكلة دخلت فى مزاجنا
أيوه .. أيوه .. أيوه
وزى حلاوتها مادوقنا
أيوه .. أيوه .. أيوه
م الفلاحين جينا جينا
جينا جينا يا وله
والنبي جينا
فوتنا كمان على الباله ..
جينا حاجات مش بطالة ..
بس الزحام هد بدنا
والسكة مليانة زباله ..
روحنا التجارى والمنشية
أيوه .. أيوه .. أيوه
يابختكوا يا بورسعيدية
أيوه .. أيوه .. أيوه
م الفلاحين جينا جينا
جينا جينا يا وله
والنبي جينا

ه البحر جينا اتمشينا
كل البلاج علي رجلينا
والرملة سخنة يا بلدينا
بتوع الشماسي ندهوا علينا ..
وقعدنا تحت الشمسية ..
أيوه . أيوه .. أيوه
والناس كتيرة رايحه وجايه
أيوه.. أيوه.. أيوه
شوفنا البنات لابسين مايوهات
أتارينا مش واخدين ستات
جينا جينا ياوله
والنبي جينا
الشيخ طه : واحسنى والله يا دراويش ..
الدروايش : أخبارك ايه .. قول ماتخبيش ..
المعلوف : اياك تتحجج وماتحكيش ..
الشيخ طه : خلوا الكلام لما نروح .. علشان نلت ونتجبع
الشيخ شنكح : مش تعرفنا على ضيوفك يا شيخ طه ..
(يقصد شلبي)
الشيخ طه : (متباهيا) .. ده بقى ولا فخر .. صديقى اللود الأسطى شلبي المزين ..
أسطى مزين قد الدنيا .. ومزين فى الزمخشري .. هو الذى يزين الناس وقد
اتفق العامة على تسميته .. بالهلاق ..
الشيخ شنكح : تشرفنا يا أسطى شلبي ..
شلبي : عجبتكم ..
الشيخ شنكح : ده أنت ماحصلتش ..
شلبي : (للشيخ طه) .. مش تعرفنى بالناس يا شيخنا ..
الشيخ طه : دول الدروايش يا سيدى ..
شلبي : أنا قصدى أعرفهم قطاعى .. مش بالجملة ..
الشيخ طه : أيوه أيوه .. ده بقى الشيخ شنكح .. وده فيلسوف .. التخين ده معلوف

شلبى : هما الجماعة دول روس يا شيخ طه ..
الشيخ طه : روس ايه وامريكان ايه ياوله
شلبى : آمال ايه أوف أوف دى؟
الشيخ شنكح : دى أسامينا الحركية ..
شلبى : (ينتفض) .. حركية .. انتو تنظيم بقى ..
الشيخ شنكح : وطفى صوتك لتودينا فى داهية .. حركية يعنى أسامى الدلع..
شلبى : دلغ؟ .. آمال أنت مش اسمك شنكحوف ليه؟
الشيخ طه : أفهم ياوله .. الشيخ شنكح ده .. كبير الدراويش ..
شلبى : يعنى الزعيم .. وأنت يا شيخ طه .. مالکش اسم دلغ .. قصدى اسم خركى؟
الشيخ طه : كان بس زمان قوى .. د .. د .. د .. نستيه
الشيخ شنكح : (ملتاغا) .. نستيه
الدراويش : مهفوف ..
الشيخ طه : أيوه أيوه .. صح مهفوف..
الشيخ شنكح : (شلبى) أصل كان عنده هقه أيامها ..
شلبى : حيث أن الحكاية مفيهاش كده ولا كده .. ايه رأيكم أنا .. أنا عاوز أتدلع ..
الشيخ طه : ايه يا وله؟
شلبى : عاوز يبقى اسمى الحركى .. قصدى الدلع بشلوف .. وانضم للدراويش ..
الشيخ طه : ايه رأيكم ..
الشيخ شنكح : احنا فى دى لازم ناخذ الأصوات .. ديمقراطية .. دروايش ..
الدراويش : شنكح ..
الشيخ شنكح : الموافق على ضم الأسطى شلبى وتسميته بشلوف .. يتفضل يرفع ده ..
موافقة أغلبية .. بس خلاص ..
(يصفقون)
الفيلسوف : يا صلاة النبى .. درويش مستورد .. احنا عندنا الحلاقين فى البلد .. غلاية
أه ويمين الله غلاية .. إنما أنت ياعم شلبى .. قصدى بشوف .. بسم الله ما
شاء الله مبسوط فى منطقة الحرة .. تلاقىك بتخلق بالدولار .. أنت شريكه يا
شيخ طه؟
الشيخ طه : أيوه .. جينا للقر .. قروا ما هى نقصاكم .. أفدىنى يا جهبذ.. منطقة حرة يعنى ايه؟

فيلسوف : ودى عاوزة كلام .. حرة يعنى عندهم حرية ..
الشيخ طه : أيوه ما تنكرش .. عندنا الحرية هنا ... مساكن صغيرة كده فى آخر شارع
الأمين على اليمين جنب النقطة .. أما المنطقة الحرة اللي فى بالك .. تعيش
أنت..

فيلسوف : يا حول الله يارب .. ماتت ..
الشيخ طه : اتولدت ميتة ..
الشيخ شنكح : ألا أنت لسه بتقرأ فى الجبانة يا شيخ ..
الشيخ طه : ماخلاص بقى .. كل سنة وأنت طيب ..
فيلسوف : آمال بتشتغل ايه دلوقتى ..
الشيخ طه : ريك مايجرمناش .. موالد ماشى .. سهرة ميت هنا .. أربعين هناك
الشيخ شنكح : آه منك أنت .. موسى ..
الشيخ طه : رجعتا للقبر تانى طيب خد عندك ده غير اللي باكسبه من التأليف والتلحين
فيلسوف : يا سلام .. وأنا أقول شفتك فين؟ ..
الشيخ طه : فين؟

معلوف : فى اعلانات التلفزيون ...
فيلسوف : اسكت يا جدع .. خلى الشيخ يكمل كلامه .. اتارى الانفتاح حلوى قوى يا
رجالة بيخلى دماغ الناس تفتح ..
الشيخ طه : جاك فتح دماغك منك .. له .. له .. له..
معلوف : اسكت بقى . وانتوا واكليتها والعة يا عم .. كله مستورد .. تأليف وتلحين والبنى
آدم ما يملاش عنيه الا التراب .. سمعنا آخر أغنية كده ..
الشيخ طه : خد عندك .. أغنية ستحدث انقلاب فى عالم الكاسيت (يلقى)

حبيبى لما أقابله	القلب قوام يشعشع
وانسى اللي عرفته قبله	والعقل وراه يفلسع
يا سلام على طول ضفايره	وعنيه جرجير مرعرع
وأن غنى الكون يسايره	يا جمال صوته المسرع
لو غاب يوم عن عنيه	م الغيظ جنبى يفرقع
عفريت يركب على	وأخن تخين يوسع

معلوف : حلوة بس لحنها مش قد كده ..

الشيخ طه : شوف يا تخين أنت يامخ ملظظ .. أنا عامل أغنية مخصوص لأمثالك اللي فاهمين أن البلد دى ميفة.. ورغم سرية الأغنية لأنى كنت عاملها مفاجأة أقدمها فى العيد القومى للمحافظة اللي اسمه عيد النصر .. الا أنى هاقولها دلوقتى عشان تعرفوا غلاوتكم عندى .. والآن سيداتى أنساتى .. سادتى .. نعيش مع رائعة الشيخ طه بن سعيد . المقيم ببورسعيد .. أغنية ..

البحر نايم نايم ..

الدرابيش : الله أكبر .. الله أكبر ..

(تصفيق حاد)

الشيخ طه : (يصرخ) يالهواتى .. كان بدرى عليكى ياختى ..

الشيخ شنكح : حد مات يا شيخ طه؟

الشيخ طه : لا .. دى المقدمة ..

(يغنى مع المجموعة)

والله لافوت واخذ قطة (بوسة)

وأقوله اتغطى

بيلعب نطة

وسكوتى ده علشان صايم

بأذن أنا فى مالطة

كله أونطه

البحر نايم نايم

واطرح شبكتى عليه

ياللى السمك جواك

مغنى ١ : البحر قال أنا مش نايم

عن الكلام وده ليه؟

وأخترتها ايه ياولاد

الجميع : (يرددون المطلع)

مغنى ١ : البحر قال خلونى ساكت

ع البر واقفين ليه؟

أنا ملحى زاد ياولاد

الجميع : (يرددون المطلع)

مغنى ١ : البحر قال أنا موجى جريح

وغضبى نور ياريت

ولحظة ما أنام ياولاد

ده حاجات كتير جوايا ماتت

دا الخوف ياناس ورطة

بقى فيه شطة

وأنينى رعد ويرق ويرج

تصلحوا الغلطة

تاخذوا القطة

الغريال

تجربة مسرحية فى فصل واحد

«قدمت هذه المسرحية فى المهرجان الخامس لنوادى المسرح بدمياط كعرض الافتتاح فى ١٥ يونيه ١٩٩٥ وقد فازت بالمركز الثانى ضمن أحسن ثلاث عروض بالمهرجان وفازت بالجائزة الأولى فى التأليف»

(حيز الفرجة دائرة غير مكتملة أشبه بالسامر - الجمهور يحيط بالحيز فى شكل قوس الدائرة الغير مكتملة لخلق جو من الألفة والحميمية بين الجمهور وجماعة الممثلين الذين يقفون بملابس الصيادين فى منتصف حيز الفرجة وظهورهم للجمهور مكونين كتلة بشرية متلاصقة تبدأ فى التفكك والانتشار لتغطى حيز الفرجة لتترجم بشكل حركى يستخدم الممثل وصوته الذى يصنع المؤثرات والموسيقى (صوت الموج والرياح)، ليتوافق مع البداية الشعرية للعرض).

ممثل :

رياح الغربة يتصفر ..

وتتكسر رقاب الغاب ..

شواشيها .. تطول الميه فى بحيرة.

مليتها الحسرة والحيرة ..

وبحر يزوم ..

أنين مكتوم ..

ونوارس كساها سواد !!

وأنا صياد ..

(يتحول المشهد لشاطئ بحر.. أجساد الممثلين تحولت الى أمواج - صياد يشلك

(يرقع) الشباك بينما يواصل الممثل حوارته الشعرى معبرا بجسده عما يقول)..

الممثل :

(يكمل) ..

فلوكتى الحلم .. والنية !؟

صافيتها وعدتى أدية

وكام فرقة .. (قطعة شباك)

وع الفرقة أنا مفطوم ..

باغيب أيام وبارجع يوم ..

ونتقابل أنا والشط ..

على كثافى هموم تتحط ..

بالجمبة والزميل ..

ولازم أشيل ..

وأشد الحيل

وطول الليل أنام صاحى

وفى جراحى ألم ساكن

جسد واهن

كأننى عليل !!
لحد الفجر ما يشفقش
وأنا باعشق
طلوع الشمس
ولما مدرتى ترشق
وأسمع همس
ما بين الميه وفلوكتى
أحس بأن ده وقتى
أجهز غزلى ورصاصى
وأربط شالى على راسى
وأقرط بيه على ودانى
ده ريح الغربية حيانى
صريخه بين عيدان الغاب !!
واحس بأن شبكى داب !
ألمه ألاقى سمكه غاب !!
واسأل . . ليه ؟
ماكنا صحاب ؟!!
ترد الريح وتصفر . .
رقاب الغاب بتتكسر . .
وبحر يزوم . .
أنين مكتوم . .
ونوارس كساها سواد !!
وأنا . . صياد

(يظهر جابر صياد الخلول مخترقا الجمهر الى حيز الفرجة مغنيا وهو يحمل
غربال الصيد)

جابر : يا صباح الفل يا خلالة . .
الخلالة : يا صباح النور يابن الخالة . .
جابر : على فين العزم يا رجالة؟
الخلالة : ع البحر مش عايضة قوالة . .
جابر : جيت الزوادة وبزيادة . .

أنا جيت بخلول زى العادة . .
زمبيلي والعدة مع الغريال
جاهزين وألسطة واقول موال
اسمعى للقول صايدك يا خلول
وح اطب البحر قوام على طول
ياليلي يا عيني ياليلي يا عيني
يا عيني ياليلي يا باباياه ياليل . .
صياد ماصيدش بشبك . .
وفلوكة ولا شلة
ومنيش باصيد السمك
أنا صيدى م الرملة
قبل ماح اصطادك راح اغنى
أنا أصلى باصيدك بتأنى
يا خلول يالذيذة أنا بعاملك
بحنان وباجيبك من رملك
تنزلى تتمايلي من الغريال
منقوضة بالواحدة وعال العال
(تنقلنا الأغنية إلى دكانه الذى يتكون بأجساد الممثلين).
باخدك وباطير على دكانى
وزباينى هناك تستنانى
حلوة وحادة بياخدوكى
ماهو أصله لذيذ
البكلويز
وبابيع اختنيا وبرجولة
كل واشبع واشرب م القلة . .
تعاليلي يا حلوة اشتري منى
انتى اللى جمالك جننى
طاوعيني تعالى اسمعى فنى
ارقصى للصبح وانا ح اغنى
يعجبني سحرك وجمالك

وعلىّ ليه تسوقى دلالك
ياخلول يالذيدة بأقولها لك
لوكننتى فرس أنا خيالك ..
يا ظريفة وع المعدة خفيفة ..
آخر طعامه فشر النيفة ..
ده زمان وحياتك يالطيفة
أنا بعث الكيشة بتعريفه ..
علشانك يا جميل ح املى القرطاس
دى خلولى بتعجب كل الناس
وعشان ياكلوها لازم تتباس
ده آخر قرطاس شطبنا خلاص
(ينتهى الغناء ويستعد لقفل الدكان - يمر أمامه حندق السماك دون أن ينتبه
لوجوده)

جابر : الى اداك بالقفه يدينا بالزمبيل يا معلم حندق !
حندق : قشطة يا جابر .. معلش أصلى مشغول شوية ..
جابر : خير ؟!
حندق : مش باين يا جابر !!
جابر : ياسااااا !! فيه ايه يا جددع لا ؟!
حندق : البحيرة اتلوثت والسماك اتسمم ..
جابر : يا راجل صلى ع النبى فى قلبك وقول كلام غير ده !!
حندق : جرانين المعارضة قايلة من كام يوم ومن وقتها السوق نام والناس بطلت تشتترى
سماك !! وحال الصيادين والسماكة .. محلك سر ..
جابر : يا عم ماتصدقش بتوع المعارضة .. دول حاجة كدة زى الديكور .. أه .. ده كلام
جرايد .. ما احنا طول عمرنا بناكل سمك البحيرة وصحتنا زي البمب أهى ..
حندق : صدق المرة دى يا جابر .. الحكاية جد وفيه تقارير ومستندات بتأكد الموضوع ..
احنا عندنا اجتماع دلوقتى فى الجمعية بتاعة السماكة .. عن اذنك ألحق
الاجتماع وبالليل أشوفك ع القهوة ...
جابر : ماشى يا معلم .. (ينصرف حندق) .. ده الموضوع بصحيح !! .. هى الحكاية
ايه؟؟؟

(اجتماع طارئ بجمعية تجار الأسماك ..)

رئيس الجمعية : كارثة.. المحافظة كذبت الموضوع وقالت دى اشاعة.. بس الناس مش مصدقة الحكومة.. والشواهد بتأكد التلوث ..

عضو (١) : بالشكل ده بيوتنا حنتخرب !

عضو (٢) : لازم الموضوع يتناقش فى المجلس المحلى وحتى مجلس الشعب ومجلس الأمن .. وبتبين حجم التلوث وتأثيره على البحيرة وصحة الناس ..

عضو (٣) : أنا سمعت كلام بيقول ان الاشاعة دى وراها ناس لها مصلحة شخصية ..
رئيس الجمعية : وضع كلامك !!

عضو (٣) : اللى بيستوردوا السمك المجمد ياريس هما اللى ورا الحكاية دى..

(تعالى مهمات الاعضاء..)

رئيس الجمعية : مش عاوزين نوزع اتهامات . ورأى تشتغلوا فى سمك المزارع اليومين دول لغاية ما يحلها حلال.

عضو (٤) : سمك المزارع سعره زاد ياريس.. كله بيعصطاد فى الميه العكرة .. والناس غلابة ..

رئيس الجمعية : وبيشتروه ؟! .. ولو زاد أكثر برضه ح يشتروه !! هى الناس كده وصعب تغييرها لكن سهل انك تغير التسعيرة .. قولتوا ايه ؟!

(بلاك)

(مقهى فى حى شعبي .. جابر يقرأ من جريدة : لبعض رواد المقهى ..)

جابر : ويقول التقرير إن مساحة البحيرة تقلصت بسبب التجفيف من ٧٥٠ ألف فدان الى ١٦٠ ألف فدان وإن الصرف الصحى قد دمر الثروة السمكية بها، وحولها من أكبر مرعى طبيعى للأسماك فى العالم الى مستنقع مصاب بأكبر معدل للتلوث فى العالم)..

القهوجى : هى ناقصة بلاوى ؟! .. وعندك واحد تلوث ع الريحة وصلحه!!

زيون (١) : دى جريمة بكل المقاييس .. ازاي ده يحصل .. فىن المجلس المحلى والجمعيات وأعضاء مجلس الشعب والشورى .. والحكومة فىن ؟!

زيون (٢) : معقولة ياناس نقتل ثروتنا بإدينا؟! .. آمال فىن الجهايزة والعباقرة بتوعنا والعلماء واللى بيتكلموا ليل ونهار فى التليفزيون (يقلدهم) . ح. فى الواقع أن وحيث أن واذا ربما وكيفما .. كلهم عجزوا عن توفير دورة مية لمصر غير بحيرة المنزلة!!

جابر : أنا كنت فاكتر ان الصرف الصحى بتاع بورسعيد بس اللى بيترمى فيها .. آتارى الخمس محافظات اللى على حدودها بورسعيد واسماعيلية والشرقية والدقهلية

ودمياط بيرموا فيها !!

زبون (١) : بس ؟!! .. والقاهرة وشرق الدلتا كله.. ده غير نفايات المصانع وبلاويها اللي
فى العاشر من رمضان ولا أكتوبر ..

زبون (٢) : وأنا أقول الشبار بقت ريحته وحشة ليه؟! ولحمة أزرق ومايتكلش!! منهم لله
اللى كانوا السبب(يدخل حندق) ..

حندق : سلام عليكم .. (أصوات ترد السلام)

جابر : شأى للمعلم حندق ..

حندق : مفيش داعى ياللا بينا ..

جابر : على فىن ؟

حندق : عازمك على أكلة شبار جوابى مبطرخ إنما ايه ..

جابر : لا ياعم .. خلينى فى الخلول .. ألحس مسنى وأبات مهنى .. تصبىح على خير ..

(منزل على وزوجته فاطمة التى تفسل الملابس)

على : مش باين !! .. عمرها ماحصلت يا فاطمة ؟

فاطمة : ماسرحتوش والا ايه ؟!

على : سرحنا ورجعنا على طول ..

فاطمة : ببقى ربنا فرجها من أول طرحة ..

على : صح .. بس السمك طلع ميت ..

فاطمة : ايه ؟!!

على : (مؤكدًا) ميت ..

فاطمة : يا راجل قول كلام غير ده .. السمك ممكن ببقى هزيل .. آه .. لكن ميت ؟!!

ازاى وهو فى ميه ؟!

على : الميه ملوثة ..

فاطمة : وده من ايه ؟

على : بيقولوا بسبب الخرفان الميتة اللي بترميها البواخر فى البحر ..

فاطمة : (فى حسرة) حتى البحر !!

على : أبويا قاعد مع الرجالة عند الحاج مسعد وعاوزين يروحوا الجمعية عشان تتصرف
مع المحافظة ..

فاطمة : السماكة سبقوكم.. ربنا يجعله بفائدة..

(يتحول المشهد الى منزل الحاج مسعد) ..

الحاج مسعد : مفيش فائدة .. صوتنا اتنبع من زمان .. ياما قولنا افتحوا البواغيز

وطهروا الفتحات ووسعوها .. عشان البحيرة تجدد ميتها .. و ..
أبو على : (ساخرا) ويفتحولها ليه ؟ هو احنا نهمهم فى حاجة احنا وعيالنا ؟ .. أهم حاجة
هما يصطادوا الزريعة من البواغيز ويبييعوها بالكيلو بالشئ الفلانى لبتوع
المزارع .. وتتحرق البحيرة وصيادين البحيرة.
حسن : ياريتها على قد المزارع ياريس .. ده فيه حوز ومناطق ممنوع الاقتراب منها
والتصوير !!

الجميع : جيش ؟!!

حسن : لا .. الجيش أخذ الشاطئ وادى حته للشرطة !! .. دى مناطق نفوذ .. ناس
كبيرة حاطة ايدها عليها باسم صيادين غلابة هما اللى فى الصورة ..
والمسطحات المائية بدل ماتحمى البحيرة .. عملتها تكية ويتأخذ فردة م
الصيادين !!

أبو على : يعنى حاميتها حراميتها ؟ .. مش كفاية سايبين اللى بيصطادوا بالغزل الضيق
؟ .. هى البحيرة ح تستحمل إيه ولا إيه ؟

الحاج مسعد : والعمل يا رجالة ؟

أبو على : نبطل صيادة لغاية مانشوف لها حل ..

الحاج مسعد : وموت يا حمار ..

محمود : وعيالنا تاكل متين ؟!!

(مكتب مسئول بمديرية الزراعة وحوار مع صحفية)

المسئول : مش مسئوليتى ..

الصحفية : آمال مسئولية مين يافندم ؟

المسئول : تحديد مناطق الصيد فى البحر صدر بقرار وزارى سنة ١٩٦٧ بسبب العمليات
الحربية ومايلغوش الا قرار وزارى زيه أو قرار جمهورى وأنا مش الوزير يا
أختى .. ولا رئيس الجمهورية يا أمة !!

الصحفية : الصيادين يقولوا أن المناطق المحددة بقت زى الأرض المجرفة من كتر ما
استهلكوها .. وبعدين مش ملاحظ سيادتكم إن العمليات الحربية انتهت من
حوالى عشرين سنة ؟

المسئول : أنا مايشغلش ملاحظ يا أمة ..

الصحفية : والحل فى نظر سعادتك بصفتك بتمثل مديرية الزراعة اللى هى طرف فى
المشكلة .

المسئول : فى الواقع إن الحل الأمثل .. الناس مش لازم تاكل سمك .. تغير شوية ..

ياكلوا حلوة ياكلوا جاتوه .. ياكلوا بطاطس أو قلقاس .. ويعدين مالها الكوسة
يعنى؟! هه.. أنا شخصيا باحبها..

الصحفية : والصيادين يافندم يشتغلوا ايه فى الحالة دى ؟!
المسئول : أى حاجة .. ومادام الحياة صعبة زى مايقولوا .. يسافروا ويحولوها من حياة
صعبة لعملة صعبة وأهو كله مصلحة للبلد .. واخدة بالك انتى يا أمة؟
الصحفية : دى عبقرية يا فندم .. حضرتك ثروة قومية .. ربنا يكثر مكن أمثالك يافندم ..

المسئول : ويخلى لنا الصحافة الحلوة .. قصدى الحرة .. يا أمة ..
الصحفية : يا .. سم ..

(يتحول المشهد الى غرزة ..)

مسئول ٣ : (يفنى بينما باقى المساطيل يتمايلون طربا على لحن الأغنية)

يا سمسمية ح أقول بقين
ماتقسميش لحن يفوق
ده من الهموم كلنا جابين
نعمل دماغ هنا ونروق
ماتقسمى لنا حجر حجرين
مع كركرة ميه فى جوزتين
وجربى تشدى من الغاب
نفسين وعلى القهوة سحب
أزرق يفوت من نفاشيشك
وَح نتسطل من تحشيشك
لاتقولى ده اللى
لاللى ياللى
ولا بتغنى لمن يا حمام
يا سمسمية ده كله كلام

مسئول ١ : هاهاها .. ح. سمعتوا آخر كلام ياجدعان ؟!

الجميع : ايه ؟!

مسئول ١ : بيقولوا .. البحيرة تعيشوا انتم .. وال ..

مسئول ٢ : الله الله الله .. لا حول ولا قوة إلا بالله. صدق وأمن بالله يا راجل.. أنا
زعلت.. هي الدفنة طلعت؟!

مسطول ٣ : بيقولوا ح تطلع من عمر .. عمر .. عمر .. آه .. أيوه من عمر أفندى ..

سبحان من له الدوام ..

مسطول ١ : (يناوله الجوزة)

شد ياخويا عشان أكمل كلامي .. كنت بتقول .. آه .. البحيرة تعيشوا انتم ..

مسطول ٢ : تانى .. لاحول ولا قوة إلا بالله .. شوف قدرة ربنا يا راجل .. تموت وتحيا ..

وتموت تانى .. واللى خلقك ونشاك وع الأرض مشاك .. أنا حزين من قلبي ..

سمعوننا الفاتحة يا جدعان

الجميع : آ .. آآآآمين ..

خلة : سعيكم مشكور ..

مسطول ١ : ماتصبروا أما نكمل النص .. ولا انتم غاويين مشاوير .. كل شوية تمشوا فى

جنازة ؟!! .. وتشبعوا فيها لطم ..

خلة : (غاضبا ملوحا بالجوزة فى الهواء مهدداً)

جرى ايه يا استاذ .. هو احنا فى مكتب حانوتى ؟ .. انت ح تفوق لى الزباين

بأخبارك المتيلة دى .. اعمل معروف ..

مسطول ١ : (منافقاً يتصنع الضحك) على رأيك يا خلة .. خليهم مساطيل أحسن ..

وحتى لوفاقوا برضه مش ح يعملوا حاجة .. البحيرة .. ماتت ..

مسطول ٢ : تانى ..

مسطول ١ : اتلهى بقى جتك نيلة .. البحيرة ماتت والبحر اتنيل بستين نيلة .. حتى مية

الحنفيات كمان ماخلصهاش تفضل نضيقة .. قامت محصلاهم وعانت هى

كمان ..

مسطول ٢ : الله .. وأنا اللي كنت فاكر ان الحكومة وصلت لنا شبكة مياة غازية للمنازل .

مسطول ١ : ما انت عايم فى الكازوزة آهه .. (صارخا فى الجميع) فوقوا بقى .. اشمعنى

أنا اللي حارق خمسين حجر .. ما اتصطلتش لغاية دلوقت .. نفسى اتسطل يا

ناس .. عشان أنسى اننا بنشرب مية مجارى ..

مسطول ٤ : مية مج .. مج .. مجارى !! .. الله الله .. دانا بادفع كل يوم خمسة جنية

للكشك اللي تحت البيت حق المية المعدنية .. وكل مافوت عليه وأنا طالع البيت

واقول له هات القزايز .. يقوللى .. عبيتها لك فى المواسير .. ده نصب بقى !!

مسطول ٢ : كله بينصب على كله .. البلد بقت كشك مية معدنية كبير .. بيقولوا بورسعيد

بتستهلك كل يوم بـ ٢ مليون جنية ميه معدنية ..

مسطول ٢ : و . . تسعة وتسعين قرش . .

خلة : وتمناية . .

مسطول ١ : وبيقولوا برضه ان ده اتفاق بين مرفق المية وبتنوع المية المعدنية . .

خلة : ده كلام خرط ياجدعان . . الحكاية ان مية بحر البقر دخلت على ترعة اسماعيلية وفيه ناس بتقول أن أحواض المية بتتنضف وطعم المية اتغير من العفونة اللي فيها . .

مسطول ٣ : لالا . . أنا أقولكم الموضوع . . دى مية خط دمياط اللي كان شغال أيام النكسة وقفلوه بعد الهجرة . . أنا سامع انهم بيجربوه . . عشان . . عشان و (كأنه يذيع سرا) الحرب ح تقوم . .

مسطول ٤ : الحرب ح تقوم ؟!! . . طب أقوم أنا الأول عشان ألحق كشك المية المعدنية أدفع له كام سنة مقدم عشان يلحق يعبى الحرب فى المواسير قبل المية ماتقوم . .

مسطول ١ : طول بالك ياسمرة . . عارف أحسن حاجة ايه ؟

مسطول ٤ : ايه ؟

مسطول ١ : تروح القسم تعمل له قضية . .

مسطول ٤ : للقسم . . والله فكرة . . أعمل للقسم قضية (يقف) أنا جاى يا حكومة . .

(تدخل كيسة مباحث)

الضابط : لا . . الحكومة هى اللي جت لك ياروح أمك . . محدش يتحرك من مكانه . . انت مش ناوى تبطل ياخلة ؟! . . عاوز تتحبس تانى ولا ايه ؟

خلة : ليه يا سعادة الباشا ؟! . . هو احنا زعلنا الحكومة لاسمح الله . .

الضابط : أمال اللي بتعمله ده ايه ؟

خلة : ولا حاجة ياباشا . . أنا فى حالى أه . . والناس ساكتة وآخر حلاوة بالصلاة على النبى . . قاعدين فى حالنا زى ما نت شايف . .

الضابط : بس قاعدين فى غرزة يا خلة . .

خلة : (مصححا) مستشفى . . غرزة ايه بعد الشر . . شوف ياباشا . . كل دول عندهم هموم تهد جبال . . ييجوا هنا المستشفى . . يشسوا الهموم تنساهم . . شوف انت ياباشا لو الناس دول فاقوا ح يعملوا ايه ؟

الضابط : ح يعملوا ايه يعنى ؟

خلة : شوف انت بقى . .

الضابط : (منفعلاً) أنا ح أهلك الغرزة . . قصدى المستشفى وح أعملك قضية بالمصطفى اللي فى ايدك دى..

خلة : قضية ... ؟
الضابط : أيوه ..
خلة : بالمصفي ؟
الضابط : بالمصفي ..
خلة : طيب .. امسك التمنية دي .. (الضابط يأخذ منه المخدرات) وأدى المصفي
ياباشا (يحطمها ويلقي بها بعيد) وريني ح تعمل لي قضية ايه ؟
الضابط : تهينة مكان لتعاطي المخدرات ..
خلة : هي الحكومة ناوية تقفل المستشفيات الخاصة ؟ .. الله .. آمال دواشتونا
بالخصخصة لية ؟
الضابط : المستشفيات مفيهاش نار يا خلة ..
خلة : الله .. هي النار عيب لاسمح الله ولا حاجة ؟! .. ده اللي عاوز يطبخ محتاج
النار .. واللي عاوز يجرد في آخر السنة المالية محتاج نار .. واللي بيغنى
بيقول نار .. والأسعار نار .. والدنيا والعة .. جت على شوية النار اللي في
ايد خلة الغلبان !! .. ولا يعنى المصفي في ايد اليتيم عجة ؟!
الضابط : (يستعرض الزبائن)
ماشاء الله .. ماشاء الله .. حشيش .. برشام .. بانجو .. بودرة .. خمرة ..
خلة : أحمدك يا اارب ..
الضابط : (للزبائن) قاعدين رايقين وآخر حلوة ومزاجكم عال العال .. مش كده ؟!
(يهزون رؤوسهم علامة الايجاب)
خلة : (صارخاً) ماتصدقهمش ياباشا .. دول عالم مساطيل ..
الضابط : (للمخبرين) فوقوهم .. وهاتوه ..
(المخبرون يضربون الزبائن ويقبضون على خلة وينصرفون - المكان تسوده
الفوضى بينما يبدأ الزبائن في النهوض) ..
مسطول ٣ : أنا عاوز أعرف ايه اللي وقع على قفايا ده ؟!
مسطول ١ : لا .. ولا حا .. ااجة .. ده قضاء وقدر ..
مسطول ٤ : مين الناس اللي كانوا هنا دول ؟!
مسطول ١ : الحكومة ..
مسطول ٤ : هو الاعلان لحق يوصل للحكومة قبل ما أرفع القضية ؟! .. داحنا اتقدمنا
خالص .. الواحد يفكر بس .. يفكر يرفع قضية .. هوب الاعلان يوصل !! .. بس

إيه القصب اللي كان في اديهم ده.. بيبيعوه ولا يمضوه...

مسطول ١ : قصب ايه ؟ .. ده شوم .. شوم يا سمرة ..

مسطول ٤ : الله.. هي الحكومة بتمض شوم..

مسطول ١ : يا عيب الشوم عليك ياسمرة.. يا عم فوق بقى .. بقولك شوم ..

مسطول ٢ : أmaal فتوات اليومين دول بقوا بيثيلوا ايه ؟

مسطول ١ : انتم قعدتكم بقت خل ..

مسطول ٢ : لأ .. مية جوزة ..

مسطول ٢ : أنا مروح .. أحسن من ساعة الحيطه ما وقعت على خدى وأنا متول يا جدهان

.. أنا حاعمل برطمان في البيت والحس مسنى وأبات مهنى .. باى .. باااااا

.. (يخرج)

مسطول ٢ : بدرى يا معلم زقلة ..

مسطول ٤ : سيويه يروح.. ح ياخذ بميه .

الجميع : ليه؟!

مسطول ٤ : مفيش كشك فيه معدنية تحت بيتهم .. يبقى مين ح يحط له فيه في المواسير؟

الجميع : مين ؟

مسطول ٤ : مفيش .. يبقى ح يشرب البرطمان ع الناشف..

مسطول ٢ : لا .. لا .. لا .. يحط فيه سفن أب .. ده راجل فنجرى .. تلاقيه حاطط بدل

المعسل بطارخ .. فهمت يا حلاوة .. ؟

مسطول ١ : أنا اللي عاوز أفهم ايه اللي بيحصل ده ؟ .. واشمعنى دلوقت بالذات؟ ومين

اللي ورا تلوث البحر والبحيرة والاقتصاد والسياسة؟ .. مين اللي عاوز يحول

مصر لمزبلة العالم وجبانة للنفايات النووية؟ مين اللي ورا محاولات طمس هويتنا

الثقافية والدينية مين؟ حد يفهمنى وأنا أديله نص عمرى .. ياناس ..

مسطول ٢ : نص مين يا أستاذ .. أنت عمرك الافتراضى انتهى وح يرحموك ياخويا ..

وكنا آيلين للسقوط ده أن ما كناش سقطنا فعلا.. شوف يا خويا من الآخر..

إدفع بالدولار.. عشان تفهم !!

(ينتقل المشهد الى منزل زقلة الذى يتناول طعامه ويحدث زوجته الموجودة

بالدخل)

زقلة : مش ح تفهمينى يا ست الحسن .. يقولك إيه.. ياللا.. منه لله.. ما السمك لذيد

أهه.. أmaal بيقلوا عليه معرفش إيه ليه ؟ ..

(تدخل الزوجة ..)

شوفيلي البرطمان واغسله وولعى حته فحم ع البوتاجاز علشان نعمل دماغ ونروق القناني يا جميل..

الزوجة : انت مش ناوى تبطل الهباب اللي بتشربه ده؟

زقلة : يا وليه افهميني.. أنا باشرب الهباب للصالح العام..
الزوجة : للإيه؟!

زقلة : آه.. باحافظ ع المجتمع من التفكك.. أنا باشرب يا وليه عشان أشوفك سندريلا . . لأننى لوفوقت ح أطلقك ياست الحسن.. روحى بقى جهزى البرطمان زى ماقلت لك..

الزوجة : ده اللي ناقص . . انت ح تعمللى البيت غرزة طب واللى نبى النبى نبى ما أنا قاعدة لك فيه يا زقلة يابن ميادة . .

(تخرج)

زقلة : ياولية استهدى بالله.. خرجت.. والنبي ياسيد يابدوى.. سايق عليك النبي ترجعها لى وليك على أجب لك دستتين شمع مستورد..

الزوجة : (يسمع صوتها من الخارج) لا لا لا . . يا شيخ سيد.. ماتضغطش على.. لأوعى ماتزقنيش (تظهر) زقلة.. يا زقلتى.. أنا جيت..

زقلة : تشكر يا عرب . .

الزوجة : زقلة . . الشيخ سيد بيقولك ماتنساش دستتين الشمع . .

زقلة : فى رقبتي يا عرب . . روحى بقى ياست الحسن جهزى البرطمان وعبيه م الحنفية .

الزوجة : المية مقطوعة يا زقلة . .

زقلة : شغلى الموتور . . هو أنا جاييه عياقة ولا ميدالية . . روحى ياولية بسرعة . .
واسقيني الأول . .

الزوجة : من عينيه يا زقلة . . (تخرج ويسمع صوت الموتور الذى يؤديه الممثلون ثم تظهر الزوجة وتضع أمامه كوب) أدى الكباية..

(تخرج وتعود بحنفية مبالغ فيها) وأدى الحنفية . . (تفتحها فينزل منها قاذورات بدلا من الماء ثم يخرج منها رجل فتصرخ للزوجة) الحق يا زقلة . فيه راجل بلبوص..

زقلة : ايه ؟ . . ايه ده ياولية ؟

الرجل : هو الواحد مايعرفش يستحمى فى البلد دى ؟ . . كل شوية تشغلوا الموتور لما شفطونا !!

زقلة : (ثائرا) مين الراجل السلبوتة ده؟.. ردى ياست الحسن قبل ما ارتكب جناية..

الزوجة : ده .. ده باين عليه جاي من عند السيد البدوى عشان ياخذ الشمع..

زقلة : شمع إيه يا ست الحسن!! إيه اللى بيحصل ده؟

(مطاردة بين زقلة والرجل والزوجة تنتهى بتحول المشهد الى شاطئ البحر حيث

جابر يعزف تقاسيم على السمسمية بينما يقول)

جابر : متكفته قلع المراكب

والصواري منكسة

على نور فئارة مخنفسة

حتى المراسى مفككة ومتفتة

متفتولة حبال الهناكر

والمدارى مسوسة

وموسوسة الدفة

... وليه متشتة ؟

مع أنه بدرى على الشتا !!؟

ممثل : النوة فاردة توب رمادى

ع البحار والبحور

وأنا قلبى من صغرى جسور

مولود فى مركب صيد وسارح

من طفولتى شيككى طارح

من صبايا حصانى موج

ياما كان غدار وجامح

ألجمه ..

بيشيلنى رامح ...

طعمه مالح

أشربه .

بقى وشى كالح ..

إنما فى البحر فالح

أعزقه مقدافى فاس ..

وأبدر الحب بمقاس ..

قامة .. قامتين أو ثلاثة

وأحصده ويقول يارب . .
وهو وحده اللي أقصده
رزاق كريم
رحمن رحيم
وأنا باعبده . .

جابر : النوة طالت والسما متلبدة

ترعد وتبرق
فوق دماغنا معريدة
وغراب يردد نغخته جوف الفضا
بيقول : قضا . .
النوة نوة مؤيدة . . بدة . . بدة
(ينسحب جابر الى تشكيل موج البحر الذي يتحول الى مركب يصارع الأمواج)

ممثّل :

كان الغراب لابس هدوم نورس ودود
بس طالل من كلامه عفن ودود . .
وعنيه حقودة مفرجة
وبضحكة صفرا مجلجلة . .
ومعدلة كل الحدود
أتاريه شعار المرحلة
بيختم عهد فوق القفا . .
والمسألة أن العقود
... ويمقتضاها المرحلة
صبحت قيود . .
وجريت بقيدى لبيتى لازم أعود
من رمش عيني أفتل حبال
لحد مايهل الهلال
والضم مراكي مسيحة
وأشد للمرسى الرحال . .
وده حلم
لاكن مش محال
وطول ما ايدي مثبته . .

الدفة وماسكة مقبته

مايهمنيش . .

لو حتى جه مليون شتا

(يقفز في المركب الذى يصارع الأمواج ويغير اتجاهاته وتتنازع الرياح شراعه

أثناء الأغنية التى يغنيها جابر)

جابر : أمانه عليك يا بحر الشوق ياواخدنا

تخلي الموج يهدى عشان مراكبنا

بقى لها زمان مفيش مرسى

ترسيها ومايتنسى

حنينها لبر أحلامنا . .

الجميع : حنينها لبر أحلامنا . .

جابر : يا بحر الشوق ياواخدنا معاك لبعيد..

معاك طالت ليالينا وأخاف لاتزيد

تزيد الغربة وجروحنا

ويبقى الموج مسوحنا

وتفضل تايهة مراكبنا

الجميع : وتفضل تايهة مراكبنا

جابر : يا بحر الشوق ياواخدنا شبعنا ضياع

مفيش مقدا فى مركبنا معدش شراع

وطال ليلنا ما بان له نهار

ما بين الموجة والتيار . .

وامتى تيان شواطئنا

الجميع : وامتى تيان شواطئنا . .

(مع ترديد المذهب يبدأ التشكيل فى العودة مرة أخرى لشاطئ البحر ويبدو

المنظر.. أمواج البحر التى صنعتها أجساد الممثلين تتوالي مع صوت الموج بينما

جابر نائما مستندا الى غريال صيد الخلول . . فجأة تظهر جنبة من البحر

وتقترب من جابر فى حذر وتستطلع المكان ثم تأخذ السمسمية من جانب

الغريال وتجري بأثامها فوق الأوتار فتصدر صوتها المميز فيتعلم جابر . .

تعاود العبث بالأوتار مرة أخرى . . فيصحو جابر ليفاجأ بها)

جابر : مين ؟ زلفانة . .

زلفانة : وحشتنى .. مقدرتش آجى الأسبوع اللى فات عشان كانوا بيستعدوا عندنا لاستقبال السلطان قراميط سلطان البحار السبعة .. وانت عارف الحاجات دى بقى ..

جابر : عازفها .. تلاقيكوا سفلتوا الشوارع ودهنتوا الرصيف وعلقتوا اليفط والصور وال..

زلفانة : ايه ده ؟ .. هو احنا عندنا شوارع تحت الميه؟ ياللا غنى وسمعننى صوتك ..

جابر : ماليش مزاج يا زلفانة ..

زلفانة : طب قول من إيه ؟

جابر : ووح أتوك ليه ؟

زلفانة : دا أنا حبيبتك ..

جابر : يخرب بيتك .. جنية تحب البنى آدمين ؟

زلفانة : وما احبش ليه؟

جابر : أحوالهم طين !!

زلفانة : أنا مش فاهمة ..

جابر : ومالوش لازمة ..

زلفانة : بس احكيلى ..

جابر : وانتى قوللى بعد ماتحكى ح تعملى ايه؟

زلفانة : يمكن أفيدك وأخد ايدك قوللى بسرعة مقريف ليه ؟!

جابر : ماصطادتش النهارده .. الخلول هجرتنى زى السمك ماهجر البحيرة .. الصيادين تعبانيين والسمكة زيهم والناس مش بتقدر ع السمك فى هوجة الأسعار .. كل شئ مش حلوا يا زلفانة ..

زلفانة : عارفة كل ده ومتوقعاه من زمان .. ده شئ طبيعى ونتيجة حتمية لتصرفات البنى آدمين الفلظ .. تعرف يا جابر حكاية بحيرة المنزلة دى ايه؟

جابر : احكى لى يا زلفانة ..

زلفانة : زمان .. زمان .. وأنا لسه صغيرة من حوالى ١٤٠٠ سنة كانت بحيرة المنزلة ملهاش وجود ..

جابر : أمال كانت ايه ؟

زلفانة : كانت جنة ربنا على أرضه.

جابر : بحيرة المزبلة .. قصدى المنزلة !!!

زلفانة : كان بيرويهها البيلوزى والتنيس والمنديس ..

جابر : دول ايه ؟ سقاين !!

زلفانة : فروع من نهر الجنة . النيل العظيم .. وكل فرع بيروى مدينة زى مدينة بيلوز ومدينة تنيس ولكل اسم أصل وحكاية مثلا .. مدينة تنيس على اسم تانيس بن حام بن نوح عليه السلام ..

جابر : يا سلاااام!! طب وبيلوز؟

زلفانة : اللي انتو سميتها بالوظة يعنى الطينة!! حد يسمي الطينة!!

جابر : عاشت الأسامي.. طب وأشتوم الجميل يعنى إيه؟

زلفانة : عاش أتوم.. كان الكهنة وقدماء المصريين متدينين ودايما يشكروا الإله الواحد.. عاش أتوم أبد الأبدية

جابر : عندكم زيهم تحت المية ؟ اهو انتى بنفسك شوفتى أجدادى وجمال بلادى ..

زلفانة : على أرض بلدك دى اتبنى أعظم أسطول بحرى .. مدينتك كانت مرسى له .. وكان له هبة على كل البحر المتوسط

جابر : كان قد ايه يعنى ؟ قد الأسطول السادس كده ؟

زلفانة : وقف على شطك الجميل ٢٥٠٠ سفينة تجارية وحربية وسفن صيد..

جابر : ياااه .. ده البمبوتية اشتغلوا شغل !!

زلفانة : وكان عندكم ٣٦٥ نوع من السمك اللي يحبه قلبك .. يعنى كل يوم نوع من السمك ..

جابر : الله يرحمك يا شبار ياخويا .. كان مزقلط ومبطرخ .. ياللا .. كلنا لها.. ما احنا اتسممنا برضه..

زلفانة : ده غير سمك البردويل اللي فى مدينة الفرما ..

جابر : أنتى ح تسرحى على يا زلفانة !! .. الفرما دى مدرسة ياختى فى شارع محمد على .. ح تقوليلى بقى مدينة و ..

زلفانة : مدينة الفرما .. اللي بناها الأمير أخو الاسكندر الأكبر ..

جابر : الأمير فرما ..

زلفانة : أيوه .. وهو اللي استقبل سيدنا ابراهيم عليه السلام ومعاه ستنا سارة .. وهو اللي أهداهم الأميرة المصرية هاجر أم المسلمين .. أم اسماعيل عليه السلام ..

جابر : أم اسماعيل عليه السلام .. الله .. دا احنا قرايب لزم .. عمار يابورسعيد .. عشان كده الواحد بيعشقها موت .. أصيلة ..

زلفانة : كل شئ فيها كان أصيل .. أعظم جنود الأرض وأعظم نسيج .. تسمع عن قماش البوقلمون؟

جابر : أبوقلمون ده ايه يا زلفانة؟

زلفانة : ده قماش لما تلبسه يبقى له الصبح لون والظهر لون والعصر لون والمغرب لون والعشا لون ..

جابر : خمس ألوان ؟!!

زلفانة : من ألوان الطيف ..

جابر : أنا عارف الواحد ما اتولدش فى الزمن ده ليه ؟

زلفانة : ما انتم كويسين يا جابر .. الزمن مالوش دعوة ..

جابر : معاكى حق .. العيب فينا احنا .. بقى هى دى بورسعيد ؟!

زلفانة : كانت زمان أقوى حصن تنهد عليه كل الغزوات وكانت المفتاح الشرقى لمصر كلها.

جابر : طول عمرها درع مصر .. يا سلاام .. دا احنا حلوين قوى .. ودى أحلى حاجة فينا ..

زلفانة : وخرجت منها أول كسوة للكعبة المشرفة ..

جابر : يا سلاام .. أمال بقت بحيرة ازاي؟

زلفانة : حصل زلزال فى المنطقة انفجرت من الأرض بحيرة كبيرة وسموها بعد كده بحيرة المنزلة تهاجر لها أنواع كتيرة من الأسماك من البحار والمحيطات والطيور المائية زى البط الشهرمان ..

جابر : عارفها .. البط الشهرمان والقطقات والنورس والخطاف والغطاس الأحمر .. والمليح والسمان وأبو قردان والبشاروش والبلبول والشرشير وألف طير وطيور ..

زلفانة : ده غير السمك زى اللوت والبورى والدنيس والمياس والقاروص والمرجان والـ ..

جابر : انتى ح تاخدى القعدة لوحدهك .. خدى عندك .. السريدين والكابوريا يعنى الحناجل والترسة والجمبرى والخلول والشبار والطوبار والحنشان والبياض والقراميط والبطاحيش .. أقول كمان ؟ ما أحنا برضه حلوين ..

زلفانة : وأنا مش حلوة ؟

جابر : أنتى جنية بنت جنية .. ماقلتيش يعنى الحل ايه فى كارثة البحيرة ..

زلفانة : نتجوز ..

جابر : ماشى (مستدركا) ايه ؟
زلفانة : ماعجيش ياد لعدى ..
جابر : أه .. لا .. أصل مفيش سكن يعنى.
زلفانة : محلولة .. عندى قصرى .. مبنى من القواقع والصدف .. يجن .. ح يعجبك قوى
وأول ماننتجوز أبويا الأمير غطيان ح يمنحك لقب أمير.
جابر : أنتى اتهبلتى يا زلفانة ؟
زلفانة : ليه ؟
جابر : عاوزانى أعيش معاكى فى البحر؟ .. تحت الميه!! .. دا أنا أغرق يا زلفانة!!
زلفانة : مش ح يحصل لأنى ح اديك نص عمرى عشان تقدر تعيش تحت الميه زينا ..
جابر : نص مين ؟ .. أنا مش مستغنى عن عمرى ..
زلفانة : يبقى مابتجبنيش ..
جابر : احنا ماتفقناش على كده من الأول .
زلفانة : جرب .. مش ح تخسر حاجة .. اذا ماعجبكش البحر إرجع للبر تانى (يتردد)
وحياتى وحياتى ..
جابر : طب والعدة ..
زلفانة : مالهاش لزوم .. ياللابينا ..
جابر : طب أسيب خبر لأمى ولا ..
زلفانة : معدش وقت ياللا ..
(تسحب فى اتجاه البحر وهو حائر البصر بين البحر والعدة .. يفوصان).

(بلاك)

(تعود الاضاءة لنرى قصر الأمير غطيان تحت الماء - حراس ومظاهر الاهتمام
بادية على الجميع .. صوت المذيع يصف المشهد مترجما الفعل الحركى
للممثلين).

صوت المذيع : أسماكى سمكاتى سمكتى .. تنضم الآن موجاتنا فى البحر الأبيض
والأسود والأحمر والميت لننقل لكم عبر قناة السويس الوصف التفصيلى لزيارة
السلطان قراميط سلطان البحار السبعة لأخيه الأمير غطيان أمير البحر
الأبيض المتوسط .. وصلت طلائع الموكب السلطانى ..
الحاجب : السلطان قراميط .. سلطان البحار السبعة ..
(يظهر الموكب السلطانى .. السلطان ومرافقوه يركبون أفراس البحر ويدورون
فى المكان ثم يتوقفون لتتحول الأفراس الى عرش فى قاعة ديوان المظالم) ..

المنيع : السلطان يستعرض حرس الشرف .. الموسيقى السمكية تعزف النشيد

الوطني للبحار السبعة ..

الجوقة : الأولى آآه

والثانية يا آه

والثالثة ايه

والرابعة ليه

والخامسة اشمعنى

والسادسة شعبنا

والسابعة ضعننا

ومن البشر بوريه !!!

المنيع : الموسيقى السمكية تعزف السلام الوطني للبحر الأبيض المتوسط ..

الجوقة : يابحرنا يالى اسمك أبيض

ولوئوك البنى آدمين ..

والا البحيرة اللى ماتتعوض

خلوها نيلة وزفت وطنين

مايهمناش غزل وسنار

كل القروش جاهزين للتار

ورحمة البحر الميت

ح نقوم سوا لآخر المشوار

المنيع : السلطان يتوجه لوضع اكليل من البككوز على النصب التذكارى للجندى المأكول.

(يذهب إلى حيث تمثال لهيكل عظمى لسمكة كبيرة) ..

السلطان يتشحتف .. وكذا منافقره .. عفوا مرافقوه .. السلطان يتوجه الى

قاعة ديوان المظالم .. مازال السلطان فى طريقه إلى قاعة ديوان المظالم ..

انشاء الله سيصل جلالته إلى قاعة ديوان المظالم .. السلطان قراميط المعظم

يجلس على عرشه فى قاعة ديوان المظالم .

الأمير غطيان : كله تمام وينعم بالأمان زى ماشفت يا مولاي السلطان ..

السلطان : لا يا أمير غطيان أنت غلطان . أنا وصلتنى شكاوى كتيرة ده طبعا غير

التقارير ..

(متافات من الخارج)

الهتافات : عشت لنا يا سلطان قراميط..

تحكمنا فى بحورنا السبعة

وياريت تحكم ألف محيط

ونجدد بالدم البيعة

بالشوك والعضم نفديك يا قراميط

السلطان : فىن أصحاب المظالم؟

الأمير غطيان : حاضر يا مولاي (يشير للحاجب)

الحاجب : الأمير شبار حاكم بحيرة المنزلة (يتقدم وينحنى للسلطان)

السلطان : بتشتكى من مين ؟

شبار : م البنى آدمين يا مولاي.. خربوها .. رعاياك فى البحيرة بيتعرضوا لهجمة

بربرية وحشية بشرية انسانية ضارية تستخدم فيها الأسلحة المحرمة دوليا يا

مولاي..

السلطان : اختصر يا شبار ..

شبار : اعتدوا على ممتلكاتنا يا مولاي .. جففوا أربع أخماس البحيرة فنتج عن ذلك أزمة

سكن حادة أدت لهجرة معظم أنواع الأسماك يا مولاي .. ده غير مخلفاتهم

القاتلة اللى بتحتوى على مواد عضوية وكيميائية وصرف زراعى حامل مبيدات

وفضلات صلبة ومواد عالقة ومترسبات مما سبب تلوث خطير بالبحيرة هدد

حياة رعاياك يا مولاي .. ده غير التلوث الحراري والتلوث بالمواد ذات النشاط

المشع والاشعاعى والنفط.

السلطان : باختصار يا شبار ..

شبار : خربت يا مولاي .. ده غير الغارات اللى بيعملوها بالشباك والصنابير والجوابى

وبيصطادوا أولادنا البطاحيش الصغيرة .. محاولات دنيئة للقضاء على جنسنا

يا مولاي..

السلطان : اللى بعده ..

الحاجب : الأمير طوبار الهليل أمير بوغاز الجميل ..

(يتقدم وينحنى للسلطان)

السلطان : مالك يا أمير .. هزيل وراعى كده.. بتشتكى من مين ؟

طوبار : المتوحشين يا مولاي سكان البر .. قراصنة .. بيخطفوا ولادنا فلذات أكبادنا يا

مولاي .. الزريعة التونو كمنونو البدع نونو .. بيصطادوها من البواغيز

وحرموننا من دخول البحيرة فى مواسم الزواج والفقس يا مولاي .. والأدهى من

كده أنهم بياخدوهم يربوهم فى مزارع ويعدين يبيعوهم فى السوق زى العبيد للمتوحشين ياكلوهم يا مولاي ..

الأمير غطيان : اتخذت اجراء وقائى يا مولاي.. أمرت القناديل بالانتشار على سواحل البحر للتصدى للبنى آدمين ولسعهم ومنعهم من نزول البحر .. مفيش فايدة جتتهم تالة يا مولاي .. الأمير كابوريا كبير الشرطة عنده ملف كامل بكل التحريات المريبة لهم فى السنوات الأخيرة يا مولاي ..
(تسمع عطسة من جابر المختفى مع زلفانة بين الشعب المرجانية)

السلطان : يرحمكم الله يا أمير غطيان ..

الأمير غطيان : مش أنا يا مولاي !!

السلطان : أنت.. طب أنت.. أنت.. أنت !! يبقى فيه حد غريب هنا.. مؤامرة.. انقلاب..

الأمير غطيان : يا كابوريا.. اقبض على المتآمرين فى الحال ..

كابوريا : أمر مولاي .. حناجل (بلهجة أمرة) .. كله القراصات .. اتبعونى ..

(حالة بحث محمومة مع موسيقى مناسبة تنتهى بالقبض على جابر وزلفانة)

قبضنا على المتآمرين يا مولاي ..

الأمير غطيان : زلفانة ؟!! .. مين ده يا بنتى ؟

زلفانة : ده إنسى يا والدى ..

الأمير غطيان : فى قصرى .. حتى انتى يا زلفانة .. لا يسلم الشرف الرفيع من الأذى

حتى يراق على جوانبه الدم ..

السلطان : ايه ده يا غطيان .. بنتك بتصاحب انسان ؟!

غطيان : أنا خجلان يا مولاي السلطان..

السلطان : أنا فاكر ان كان لك بنت زمان اتجوزت إنسان..

غطيان : وطلع جبان وعمل فككان .. حبستها فى قصر المرجان .. من ساعتها

وأما ماتت بحسرتها.. (لابنته) يا حذرك يا زلفانة.. ح تجينى ندامة ..

زلفانة : يحبه يا بابا .. ده إنسان غلبان كحيان .. و ..

جابر : ماتحترمى نفسك لأخذك على حنطور عينك.. أوقع لك العرجى..

السلطان : تعالى يا انسان ..

(جابر يتقدم نحوه)

لسانك حصانك إن صوتته صانك.. وان هنته هانك.. ايه اللي جابك هنا؟

جابر : اسألها هى مش أنا !

السلطان : ردى يا زلفانة ماتبقيش جبانة ..

زلفانة : بحبه يا مولاي السلطان ..
 السلطان : (لجابر) وأنت بتحبتها يا انسان ؟
 جابر : أنا بحب كل خلق الله ..
 السلطان : حدد اجابتك يالا يا آه ..
 جابر : أنا بصراحة باحب أمي ..
 زلفانة : حرقت دمي ياغشاش ياخاين اهئ اهئ اهئ ..
 غطيان : ثلاثة اهئ .. لازم يتحاكم ..
 جابر : دا أنا من أصحاب المظالم ..
 السلطان : بتشتكى من مين ؟
 جابر : م البنى آدمين ..
 الجميع : ايه ؟!!
 جابر : أيوه .. مايستاهاوش النعمة اللي ربنا اداها لهم ، لوثوا البر والبحر والجو
 كمان .. خرموا الأوزون يا راجل ..
 السلطان : مين الأوزون ده يا غطيان؟ .. معانا ده ولا مين ولا ايه .. آه ؟!
 غطيان : ده من ألد أعدائنا يا مولاي .. كويس أنهم خرموا له طبقته ..
 السلطان : غطيان .. كل ماييجي .. خليه يخرموا له طبقته ..
 جابر : الناس ع البر زيكو تمام .. انتم عندكم السمك الكبير بياكل الصغير .. واحنا
 عندنا نفس الحكاية .. زى ما عندكم بحور ومحيطات عندنا دول وولايات وبرضه
 الكبير بياكل الصغير ..
 السلطان : أصابه هذيان ..
 جابر : لا .. أنا واعى .. مش أنا اللي اتحاكم .. لا .. كل الحكومات هي اللي لازم
 تتحاكم وياريت يكون الحكم بالاعدام غرقا فى بحيرة المنزلة .. المهزلة .. الـ
 السلطان : دى حالة جنان .. ياسجان خد الانسان .. ويوضع على الشخشخان ويرفع
 الديوان
 جابر : هاتولى النيابة .. أنا عاوز مخامى .. بلاش الشخشخان .. الحقينى يا زلفانة ..
 (مؤثر حزين .. جابر مكبل فى شباك صيد يحرسه حارسان .. تقترب زلفانة
 منه بحرص شديد .. ينتبه .. يهتمهم بالكلام .. تمنعه وتفكه ويتسللا بينما
 ينتبه أحد الحارسين ويلمحهما فى آخر لحظة) ..
 الحارس : (يصرخ) اجمعوا الفرسان .. انسان هربان .. (يتجمع الفرسان وتبدأ
 المطاردة .. جابر يكاد يقع فى أيديهم وينالونه .. يقلت .. كابوريا ورجاله فى

إثره يقتربون منه لمسكون به)..
جابر : (يصرخ) سييوني .. أه .. مين ؟ كابوريا ..
(يجد نفسه على الشاطئ بجوار العدة وجندي حرس الحدود يوقظه بمؤخرة
البندقية)

أه .. ياه .. أنت؟

الجندي : أيوه أنا ..

جابر : حتى في المنام ؟ .. نعم .. فيه ايه؟

الجندي : الساعة سبعة دلوقتي ..

جابر : هو أنا سألتك الساعة كام ؟ .. ومع ذلك ايه المشكلة يعني ..

الجندي : ممنوع التواجد على الساحل من بعد الساعة السابعة بالليل ياريس ..

جابر : هو الساحل ح يخلص حاجة؟

الجندي : عشان التهريب والمخدرات .. أمال احنا بنسهر ليه ؟ .. احنا قافلين كل
السواحل والحدود والمطارات والموانئ وعينينا مفتحة قد كده.

جابر : أنا شاك بصراحة في حكاية العينين المفتحة دي .. بقوا مابيشوفوش حاجات
كثيرة ..

الجندي : ليه احنا بنلعب .. محدش يقدر يعدى ولا كده ولا كده .. هي فوضى ؟

جابر : غريبة (لنفسه) أمال المخدرات بتيجي منين ؟

الجندي : بتقول حاجة ياريس؟

جابر : باكلم نفسي .. أصلى من زمان ماشوفتهاش .. كنت مخاصمها واتصالحنا
خلاص ..

الجندي : الصلح خير ..

(جابر يحمل العدة ويمشي تاركا الغريال خلفه .. الجندي ينتبه ويحمل الغريال

الصغير وينادى على جابر) ..

الجندي : ياريس .. ياريس ..

جابر : (يتوقف ويلتفت اليه) .. أى خدمة؟

الجندي : غريالك ..

جابر : أه .. لما بتلقوا حاجة ع الشط بتودوها فين ؟

الجندي : بنسلمها للحكومة ..

جابر : أه .. حط الغريال على وشك كده. الجندي : (يضع الغريال على وجهه)
شايفنى؟

جابر : بص للناس، دى كده (ينظر الجندى للجمهور) شايفهم كويس . .
الجندى : أيوه . .
جابر : خلاص . . إدى الغربال للحكومة . . يمكن تقدر تشوف منه . .
(بلاك)

(تعود الاضائة لنجد جابر يغنى بمصاحبة زملائه الخلالة والصيادين)
عشقت الرملة والميه على شطك
وموج الحلم يحدفنى على برك
سمعت الشكوى بتتن فى جدار صممتك
وشوفت الة مربوطة بحبال صبرك.
ورغم الشدة أنا عاشقك
رضعت هواكى من صغرى . .
على جبينى قرئت اسمك
وعشانك يهون عمرى
(تنتهى الأغنية وقد تحول الشكل إلى مجموعة من البشر تشدها إلى قاع البحر
أحمال ثقيلة من التلوث -يثبت المنظر)

(ستار)

رقم الإيداع : ٩٨/٩١٣١

شركة أهل للطباعة والنشر